

寒竹堂涉筆 上下

銅卷藏

共三十五

青壯館全書

七







青莊館全書卷之六十八

寒竹堂涉筆目錄上

百弓為結

誕報廟

劉綖題名

崔孤雲画像

星州關侯廟

相臣三百一人

天咫玉格

清人詩

朴春鳳

郭弼夏

鄭桐溪山城劄子

安處順

鄭桐溪癸亥疏

盧友明

正統天子

羅麗年弔





三四年前一布衣

咸陽名賢

俞潛溪

曹南冥

苦

新羅名僧碑

金龍垤

孤雲論儒釋

田禹治

朴邕序

沙斤驛丞案

數樹亭

李凌壺

富民戾

申尚州

鷺鳥種類

胡中丞

昭炤

牆籬複姓

魍魎防等



烏鰂魚墨

終丹

彌陀山

權松溪

垣柵鷄長煖

有磷驛上山

大朗慧

智證

慧昭

惠風詩

伽倻山記

白黑臀



青莊館全書卷之六十八





青莊館全書卷之六十八

完山 李德懋 懋官

著

男光葵 奉杲 編輯

德水 李晚秀 蕙隣 校訂

寒竹堂涉筆<sup>上</sup>

百弓為結

新羅曦陽山鳳岩寺智證大師塔銘崔孤雲所撰有  
曰捨田五百結後人有註之者曰方俗以周百弓為  
結四肘為一弓肘一尺八寸四肘即七尺二寸蓋以  
結為田數自新羅時已有之古者百步為一畝百畝



當一結

誕報廟

正崇朝

南原府城西有關王廟辛丑春  
今上御筆誕報廟  
三字 命監書齋往揭之壬寅秋余赴沙驛歷謁焉  
關王木像甚壯大金冠紅袍前有二將侍立庭有碑  
萬曆己亥都督劉綎所剏而碑皆剝落文亦綎所製  
語甚野拙筆亦荒仄

劉綎題名

雲峰之西曰女圓嶺東南曰八良嶺女圓高峻距平  
地十里往往黑石如屏一石可丈餘刻萬曆二十一



年癸巳歲仲夏月征倭都督洪都省吾劉綈過此字  
大如掌硬險可觀過此石稍東路南有石削立西向  
刻萬曆二十二年甲午歲仲春月征倭都督豫章省  
吾劉綈又過字較前石稍整方癸巳刻填紅而露立  
故人易見之甲午刻字與石純黑而隱立故人或未  
見壬寅秋再過時始見之

崔孤雲画像

海印寺有崔孤雲画像有人書其旁曰乙巳生唐僖  
宗光啓三年新羅真聖女主曼元年也其僊文有巫  
峽重峯之年綵入中原銀河列宿之歲錦還東國蓋



唐昭宗乾寧三年丙辰入中原後梁太祖乾化二年  
壬申還東國按海印寺善安住院壁記末書內供奉  
兼翰林學士承務郎前守兵部侍郎權知瑞書監事  
賜紫金魚袋崔致遠撰又書上唐光化三禋天一泰  
齊陽月霧日記若然則十四歲已做高官而仕新羅  
且有討黃巢檄巢亂在於唐僖宗廣明元年庚子則  
孤雲尚未生也乙巳生之說恐非後考似是戊寅生  
乙巳年東還也

星州關侯廟

星州府西有關侯廟侯金冠綠袍據椅而坐右手持



槍左手執劍左有一將白晢踞坐右有二將一將兩手持槍椎一將四臂一手持銳鉞三手無所執二將俱赤顏號怒竟不識何名也

相臣三百一人

我朝相臣	太祖朝七人	定宗朝四人	太宗朝
十一人	世宗朝十五人	文宗朝一人	端宗朝
三人	世祖朝十八人	睿宗朝二人	成宗朝十
一人	燕山朝十二人	中宗朝二十四人	仁宗朝
二人	明宗朝十二人	宣祖朝三十四人	光海朝
七人	仁祖朝二十三人	孝宗朝八人	顯宗朝



當字即  
正宗朝

十一人 肅宗朝三十八人 景宗朝四人 英宗

朝四十五人 摠二百九十三人 并計 當字朝自丙

申至壬寅相臣凡八人為三百一人 端宗朝癸酉

世祖大王以首陽大君為領議政今不敢并計焉○

前朝相臣入我 朝為相臣者二人 裴克廉沈德符

皆高麗侍中也 前朝文科二十二人 太祖朝趙浚

鄭道傳權仲和 定宗朝成石璘李舒閔霽河崙

太宗朝李稷南在柳亮韓尚敬朴訔沈渥 世宗朝

李原鄭擢柳觀趙洎黃喜孟思誠權軫許綢○相臣

宗英一人 世祖朝龜城君浚隱逸六人 光海朝鄭



仁弘 顯宗朝宋時烈 肅宗朝許穆朴世采尹拯  
權尚夏武臣五人 世宗朝崔潤德 中宗朝朴元  
宗 仁祖朝申景禎 孝宗朝具仁屋 顯宗朝李  
浣蔭二十六人 太祖朝裴克廉金士衡沈德符柳  
曼殊 太宗朝李居易李茂趙英茂柳廷顯姜筮  
世宗朝盧閑李貴齡南智 端宗朝韓確 世祖朝  
韓明澮黃守身沈澮洪達孫康純 成宗朝尹士旻  
韓伯倫成奉祖尹士旻 仁祖朝沈器遠金自點  
孝宗朝李時白元斗杓○相臣致仕二十五人 太  
祖朝權仲和 定宗朝河崙 太宗朝柳廷顯 世



宗朝柳觀黃喜孟思誠權軫李貴齡河演 世祖朝

李仁孫 宣祖朝沈守慶鄭琢 孝宗朝具仁庶

顯宗朝宋時烈 肅宗朝南九萬 景宗朝崔奎瑞

英宗朝閔鎮遠李宜顯李台佐金興慶金在魯俞拓

基金尚魯洪鳳漢金致仁致仕還卜三人 定宗朝

李舒燕山朝柳洵 景宗朝李光佐惟舒再致仕再

還卜卜而八拜首相者一人 肅宗朝崔錫鼎起

復拜相者二人燕山朝金壽童 仁祖朝張維拜相

不就者四人 仁祖朝張維 肅宗朝尹拯權尚夏

景宗朝崔奎瑞未及出而卒者惟 肅宗朝閔鎮長



而已早年拜相者二人 世祖朝龜城君浚年二十  
八拜領議政 宣祖朝李德馨年三十九拜右議政  
老年拜相者二人 肅宗朝許穆尹拯年八十一拜  
右議政 相臣配享四十一人 太祖室趙浚南在  
太宗室河崙趙英茂鄭擢 世宗室黃喜崔潤德許  
稠申鑾 文宗室河演 世祖室權肇韓確韓明澮  
肅宗室朴元亨 成宗室申叔舟鄭昌孫洪應 中  
宗室朴元宗成希顏柳順汀鄭光弼 仁宗室洪彥  
弼 明宗室沈連源 宣祖室李浚慶 仁祖室李  
元翼申欽金瑬申景禎 孝宗室金尙憲宋時烈



顯宗室鄭太和 肅宗室南九萬朴世采尹趾完崔  
錫鼎 景宗室李濡 英宗室金昌集崔奎瑞閔鎮  
遠趙文命金在魯

天咫玉格

胡元瑞筆叢云段成式酉陽雜俎所列目玉格宋人  
以下亡不駭其異而未有得其說者今考玉格所談  
二典事則玉檢之文也元瑞該洽在明世為升菴之  
亞而獨不知此二義何也雲笈七籤云青華小童曰  
恭承太上嘉命試守青華之宮內東殿金房玉格有  
寶經三百卷玉訣九千篇元瑞既誦末人之不知其



義而雲笈七籤宋史藝文志張君房雲笈七籤百二十卷

清人詩

江干多是釣人居柳陌菱塘一帶疎好是日斜風定  
後半江紅樹賣鱸魚比王漁洋真州絕句余於柵門  
店壁見蒙古博明哲齋所書海氣三山日欲昏半空  
飛散鳳皇群脩蛾不展綠何事悞懷罡風壞繡裙此  
馮定遠遊仙詩曹主簿允亨書八幅屏風于搗文院  
一幅各書一絕時柳檢書得恭誦此絕曹遂書之女  
牆倒影下寒空樹杪飛橋掛遠虹歷下人家十萬戶



秋來都在鴈聲中此申晁盟泛舟明湖詩四百橋邊  
茂苑東纖腰舞殺為春風吳孌一一嬌鶯似生長遊  
絲落絮中此屈翁山姑蘇柳枝詞右四詩余嘗愛誦  
坐驛樓無所聊手裁宮紈摺扇式牋題之揭壁

朴春鳳

戊申年逆賊鄭希亮舉兵叛于安陰縣據咸陽郡召  
郡倉守吏朴春鳳開倉出穀春鳳不納鑰匙賊以兵  
脅之春鳳張目大言曰安陰鄭生負何與於王庫  
之穀賊遂亂撲六七日迺死當時無人顯發至今人  
心為之怫然



郭弼夏

玄風郭弼夏居昌李敦皆謹拙堅確之士也相與結社人稱莫逆又結婚姻郭之女子卽李之子婦李一日訪郭語次以爲同郡有異事某村女踏碓舂米有獵夫放銃獵雉飛丸誤中女背洞腦而出仍觸入扶拐之腕竟無恙蓋所目覩郭正色曰寧有是理不意君亦虛言因與絕交命其諸子亦與之絕仍不往見其女子者凡三月郭遊海印寺過居昌舂女之家試問李所傳言歷歷皆不誣郭始悔悟往見李相好如前李遂戒子弟曰凡非常之事雖真的目覩不可傳



說以郭君而幾不信我况他人乎

鄭桐溪山城劄子

鄭桐溪山城第四劄子伏以臣之自決政爲不忍見  
殿下今日之事而一縷殘命三日猶存臣竊怪之嗚  
吉旣使殿下稱臣出降君臣之分已定矣臣之於  
君不徒以承順爲恭可爭則爭之可也彼若未納  
皇明之印則殿下當爭之曰自祖宗受此印今將  
三百年此印當還納於明朝不可納於清國云彼若  
求助攻天朝之軍則殿下當爭之曰天朝父子之  
恩清國亦知之矣教子攻父有關倫紀非但攻之者



有罪教之攻者亦不可云則彼之凶狡亦必諒之矣  
伏願 殿下以此二者爭之不已無得罪於天下後  
世不勝幸甚臣命在垂盡既不能扈駕又不能哭辭  
於路左臣罪大矣臣本職及兼帶并命改遞使臣得  
以瞋目取進止此劄可以泣鬼神而爭日月然危忠  
所激語涉譏謗洵為白玉微瑕其曰臣之於君不徒  
以承順為恭句恐未穩當驟看似直切而無惻怛懇  
到氣像

安處順

安處順字順之文成公裕之後也父典籍璣母北陽



林氏生六歲殘卒仲父判書環育于家正德癸酉舉進士甲戌登丙科歷藝文檢閱弘文正字戊寅除永禮縣監時事大變所嘗從遊者相繼擯黜李符以使事至全州遂與之會酒半酣感傷世故泣下不能禁朝議譁然欲中之卽移疾而歸築室鵲水之上黨禁稍解甲午拜典籍轉奉常判官卒年四十三為人端潔處事敏果待人以誠嘗以不及事父為痛事母致孝母食然後始食食不如常則亦不敢飽及遭故三日不進勺水晷而後始食糲飯鹽而不醬不食菜果獨處土炕以致哀慕夜必倚壁或掛繩懸髮警昏睡



鷄鳴上塚哀哭仍就伯仲廬遲明哭于几筵遂抵廚  
間手供饌具上食不廢寒暑天雨雪必擁篲掃除塋  
域三年一如始哭哀至輒哭不與人對言未嘗見齒  
謹於祀事三日齋浴不解衣以寢每遇二親生朝陳  
遺衣以祭哀泣不怠事伯仲如嚴父內外姪甥數十  
人常聚會而教之於物無所顧慮周濟貧乏救解患  
難與朋友交不以利害易其心己卯士禍趙先祖謫  
綾州時為求禮馳往與會知舊之擯于南者亦皆極  
力資遺不少沮男塚塋廬禎官判書

鄭桐溪癸亥疏



鄭桐溪癸亥拜司諫辭職疏救鄭仁弘曰戊申鄭仁  
弘陳疏攻柳永慶因有竄謫之命臣於其時為仁  
弘伸救而言及永慶矣至于今日永慶復其官爵已  
為無罪之人臣雖欲強顏從仕其於物議何哉臣於  
仁弘雖無執卷受業之事而師生之分則已定久矣  
自癸丑以後論議之顛錯如出別人之手臣亦怪之  
恥有師生之名而此皆八十髦荒之後也近則沂潔  
瀚澮之徒縱吏嫁禍遠則爾瞻續男之輩愚弄媒孽  
昏耄見欺之狀豈不可哀乎記曰悼與耄雖有罪不  
加刑焉仁弘之罪雖在罔赦而至於施之極刑緣坐



籍沒之律與爾瞻纘男輩一體施行則非但有違於古經母乃或傷於聖上新服之初務從寬典之盛德乎師生以義合不可則絕而人之指目者必以臣為仁弘之門生臣雖欲強顏立朝其於物議何哉

盧友明

盧友明字君亮豐川人叅判叔公孫也父昉藝文校理母居昌慎氏早孤從師力學聲稱諸蔚與兄進士友良弟進士友英俱有文行年二十八戊午舉進士遭母喪時當熒山下令短卷能持制不寢自是不治舉子業書籍自誤家世素貧不治生產少養于祖母



金氏特鍾愛將厚賜土田臧獲皆辭不受築小堂自  
號信古蒔梅竹藥草几案必整書帙不亂不喜與人  
往來然有造謁亦皆款接供酒饌不計有無有來問  
學教誨不倦金安國觀察慶尚與安遇盧瑋金大有  
同薦于 朝除 集慶殿叅奉轉 顯陵庚辰棄官  
歸癸未卒為人端重簡潔出言侃侃平居衣冠肅整  
非有故未嘗偃息委巷非禮之言不接於口恬澹清  
苦安分守約事親孝與人信惠於僮僕有所忤心亦  
不訶詈先曉喻而後捶罰然見人非違未嘗不深責  
之為詩清澹識字義音韻偏旁點画清濁高低無不



精解善楷書倣東晉見人明經者要其記誦不忘點  
竄標識於經傳輒責之曰聖賢訓辭何敢污蔑如是  
耶與文獻公鄭汝昌同里閑嘗問業門下專精閩洛  
之書端坐一室手抄口誦娶順興安氏典籍璣女後  
娶安東權氏生負時敏女男三禧進士禎判書祿察  
訪女牧使申潛

正統天子

自書契可攷黃帝以後至于今乾隆正統天子凡一  
百五十八南北朝五季不計焉年記為四千四百九  
十零



羅麗年號

新羅法興王二十三年始有年號曰建元真興王十二年改元開國後又改大昌三十三年又改鴻濟真平王六年改元建福善德女主三年改元仁平真德女主元年改元太和四年始去年號高麗太祖建元天授光宗建元光德

三四年前一布衣

戊戌九月余宗兄禁將公拜統制使赴任余以百錢賞柿商歸馬將穫稻天安欲追別公于天安客舍馬骨立不善步且騎且行謁于客舍將藪沙斤驛吏進



馬馬面長三尺赤毛徃徃有淺白點如鹿斑昂昂駿品也辛丑十二月余拜沙斤察訪明年二月乘此馬赴任計其年則為五年而以月計之才三年餘也余以白徒書生受聖朝厚恩驟遷至此可謂布衣之榮極矣將過天安召佃客之前所侵侮者慰見之皆縮伏不敢仰視官不在大小足可以觀人情遂有詩曰三四年前一布衣郵丞雖冷驟遷稀行行駿馬青青傘到處淮陰舊釣磯此馬今雖老瘦騎則便穩如倚榻坐床為慶尚道十一驛之第一

咸陽名賢



咸陽名賢蔚然一代今則遺風泯焉有書院五所濫  
溪澹洲二書院卽賜額也濫溪書院文獻公鄭一  
蠹鄭桐溪蘊姜介菴翼享焉俞潛溪好仁院中作別  
祠而享焉澹洲書院盧王溪禎獨享栢淵書院崔孤  
雲致遠金仙畢宗直以名宦享焉道谷書院趙德谷  
孝全鄭竹堂六乙盧松齋叔全享焉竹堂一蠹之父  
也松齋王溪之曾祖也龜川書院袁濫溪沿沫朴春  
塘孟智梁九拙喜梁送老灌河愚溪孟寶姜琴齋漢  
享焉桐溪生於安陰而以隣近享焉李青蓮後白亦  
生於咸陽而獨無享焉人皆恨之



俞潛溪

咸陽人相傳俞潛溪以母老南歸 成廟賜二珠到  
漢江舟中遺落于水潛溪以不保 上所賜稱死罪  
北望慟哭少頃有鯉躍入舟中剖其腹二珠現焉潛  
溪既卒 上悼念不已命風水者相地而葬必擇子  
孫繁衍之地潛溪子某不肖徒藉為名父之子不善  
待風水者風水者心怒故擇子孫零替之地至今不  
振云

曹南冥

曹南冥初甚儉約以麤衣櫟馬出野商人爭路推墮



馬下詬罵而去南冥歎曰士君子被服寒素迺為販  
奴所侮自此遂華衣好馬僕從豪健人皆讓途不敢  
忤視因歎曰士君子修飭邊幅固應如此後以汰侈  
聞至今晉州丹城之人盛飭衣馬蓋其遺風云

苦

崔孤雲初月山大崇福寺碑有曰益丘壑餘二百結  
酬稻穀合二千苦注東俗以五畝減百為結斛除一  
斗為苦案華音苦音蟾東音則為占言以苦為空石  
呼空石音蟾蓋東俗初從華音華字以空石為苦而  
後乃苦音蟾譌為占仍忘苦字之音與義也



新羅名僧碑

有唐新羅國故曦陽山鳳岩寺教謚智證大師寂照之塔碑銘并序八朝賀正兼迓奉皇華等使朝請大夫前守兵部侍郎充瑞書院學士賜紫金魚袋臣崔致遠奉教撰○有唐新羅國故兩朝國師教謚大朗慧和尚白月葆光之塔碑銘并序淮南入本國送信詔書等使前東面都統巡官承務郎侍御史內供奉賜紫金魚袋臣崔致遠奉教撰○有唐新羅國初月山大崇福寺碑銘并序前西國都統巡官承務郎侍御史內供奉賜紫金魚袋臣崔致遠奉教撰○有唐



新羅國故智異山雙溪寺教謚真鑑禪師碑銘并序  
前西國都統巡官承務郎侍御史內供奉賜紫金魚  
袋臣崔致遠奉教撰并書篆額

金龍珽

童子金龍珽家貧親老持索行乞納一文有曰顏子  
雖云樂貧如使顏路而病且餓則必不暇安簞瓢而  
謀甘旨也曾子雖云安貧如使曾皙而病且餓則必  
不暇樂弦誦而營餼糧也余歎曰言之至此使天下  
之人有儒名而使親饑者噤口不敢自白然顏曾當  
之不必乞丐應有調度不避賤事不如東國士抵死



不敢力作畏人嘲笑也

孤雲論儒釋

崔孤雲曰道不遠人人無異國是以東人之子為釋  
為儒必也西浮大洋重譯從學命寄剗木心懸寶洲  
虛往實歸先難後獲亦猶採玉者不憚崑丘之峻探  
珠者不辭驪壑之深遂得慧炬則光融五乘嘉肴則  
味飫六籍竟使千門入善能令一國興仁孤雲此言  
為新羅號稱禮義之俗之斷案惜乎鄉貢之生祇是  
俗儒北學之僧反多名釋佛教勝於文教未能大進  
于中國者有以也且唐三百年大播詩聲則新羅之



人親炙名家亦云多矣而巨擘擅場當推孤雲然其  
詩平平何嘗有唐賢清新警絕一句半篇乎孤雲而  
如此則他可知矣蓋新羅之人生於重山複嶺之間  
鈍根常留慧竇未關風俗之膠固未如之何也至若  
昭代則人文漸開間有英才雖無入學之規年年陸  
行文士時入而但無心悅之若誠如夢如睡真成白  
痴無所得而空來所以反遜於新羅之勤宗也大抵  
東國文教較中國每退計數百年後始少進東國始  
初之所嗜卽中國衰晚之所厭也如岱峯觀日鷄初  
鳴日輪已騰躍而下界之人尚在夢中又如蛾看山



雪五月始消

田禹治

田禹治潭陽人兒時讀書佛菴僧釀酒一甕使之看  
守下山僧歸見酒渴而只有糟粕責禹治偷飲禹治  
無以自白更托又釀一甕吾當捉盜僧如其言酒將  
熟禹治見有白氣如虹從窗間入接于甕口濛濛有  
酒香遂尋白氣所起處接于前山岩穴穴口有大白  
狐醉眠禹治以繩縛其喙足負而歸懸于菴樑讀書  
自若少選狐酒醒作人語哀訴曰若脫我則當厚報  
子禹治曰報我何物若又逃去奈何不如殺之之為



快狐曰我有幻訣藏于穴中持此報子試以繩係我  
縱入穴中如不出引繩出之殺我未為晚也禹治如  
其言狐取一素書獻之遂放狐披視皆靈詮秘呪遂  
研硃點其易悟者數十段俄見其家老婢被髮痛哭  
來傳其父之訃禹治棄其書蒼黃出門則老婢不知  
去處禹治始覺為妖狐所賣矣仍還收狐訣狐只留  
硃點者餘皆割去禹治後以幻術鳴於世皆從硃點  
數十段中受用云

朴邕序

新羅憲康王召大朗慧和尚將還山命群臣賦送歸



之詩在家弟子王孫蘇判嶷榮首唱侍讀翰林郎兼  
崇文臺瑞書院直學士薩飡朴邕製贈行詩序曰自  
竺乾而暨乎震旦心印潛付法燈相傳者於六祖傳  
并詳之矣我大師鷄林卓錫鰲壑乘杯歷踐三秦巡  
遊百粵乃於麻谷終獲玄珠也及乎會昌沙汰之際  
結侶東歸自後班荆蔭松韜光晦影寒溪洗鉢巖壁  
倚筇積有歲矣來學者何止三千密契者豈惟十哲  
進于景文王御宇之辰頻降綸言特遣星使來儀帝  
闕弘敬禪談欽哉稱師缺攀缺禮又迄于今上登極  
之六載天書催召京輦再唐因於宮中置缺缺飯惟



香積殿乃普光忘機殿對若孤雲之寄太虛隱性空  
談如皎月之臨止水吳王之迎康會晉帝之值佛洪  
不可同日語也睿獎加號殿闡禪林朝僚競參喧闐  
梵宇大師不繫浮雲之心長懷岩壑雖拘野鶴之性  
苟厭塵寰聖上優詔便許歸山此日也暮山紫而天  
宇雲愁松逕青而岩扉雪掩恩旨特令孔徒釋輩業  
習離蟲者各贈詩餞行邕不揣荒蕪乃裁狂簡題斯  
短序冠其衆篇雖乏英英精彩猶有唐文典刑

沙斤驛丞案

沙斤驛丞先生案舊有而中間遺失 顯宗八年丁



未察訪趙相遇始修輯以李榮春為首其次沈日章  
李洄韓行四人無到任瓜蒲年月自李喜慶始有年  
月萬曆九年宣祖十四年辛巳到任自李榮春至  
趙相遇凡四十二人自趙相遇之交承方以遠至于  
余凡六十五人總一百七人金宗武居善山萬曆庚  
寅八月到任壬辰四月尚州戰亡沈司諫大孚崇禎  
己巳到任卽歸金縣監壽徵肅宗己未到任卽歸  
李陰竹麟祥英宗丁卯七月到任己巳八月瓜蒲  
皆最有名稱可知者也今右議政金公燧英宗庚  
寅正月以弼善違牌補外二月宥還歷考案中諸



公在任年月則自萬曆年間至崇禎壬午或七年六年五年四年自李楚老始任三年而此後徑遞者相望亦可以觀乘除之理也察訪邊宗洙追錄蔡無逸於案首曰 中宗壬午生負第一以沙斤察訪 中宗三十五年庚子登丙科第一官止獻納

### 數樹亭

李凌壺麟祥為沙斤察訪多所設置持心公廉而又東吏余問老吏五六十年来何官最善為政吏舉凌壺以對蓋書画文詞之人例多不識事務若米顛倪迂者是也凌壺能兼吏治衙軒揭寒竹堂扁劈窠大



篆額道偉軒東隅有杜冲紅梅古松修竹之屬凌壺  
構一笠瓦亭於樹間東臨荷塘有蕭然之致數樹亭  
三字宋文義文欽所書八分北棟揭凌壺自書古人  
非傲吏自關經世務偶寄一微官婆娑數株樹取摩  
詰詩意以名亭崇禎再己巳季春書

李凌壺

李凌壺性剛果咸陽嘗有所親書生一日謂書生曰  
吾欲訪君家而路過南人之村不可訪也又嘗訪一  
書生家坐語良久忽有客升堂凌壺不告主人遽然  
起去書生怪之後問其故迺曰向者客南人也故吾



若浼而避又嘗愛一書生一日書生於坐間偶拈書帙而觀之凌壺正色責之曰長者書少者安敢取覽仍踈而斥之咸陽人陳生嘗向我道之

富民侯

文益漸字日新小名益瞻晉州江城縣人也高麗恭愍王九年元順帝至正二十年庚子擢第與鄭夢周同榜見麗季儒學廢而釋教行慨然以繼絕學為已任倡明正道詆斥異端教人必以忠孝之行性理之學二十四年甲辰以左司議大夫奉使入元會崔濡譖恭愍王于順帝欲立德興君而自為相益德興君



時為上使濡又譖益漸曰副使文益漸素稱剛直必  
不從命願陛下抑之也順帝召益漸謂之曰麗王荒  
淫朕欲廢王立德興君爾為何如益漸對曰君臣之  
義無所逃於天地臣雖無狀不敢奉詔順帝怒曰朕  
志已定陪臣違命罪當死中朝諸臣為救解遂竄于  
南荒益漸因商人之來東者密通崔濡事于恭愍王  
二十六年丙午九月宥還見途旁田中有草白花如  
毳使從者金龍摘取而看守田老嫗曰此草綿也外  
國人移種有屬禁慎勿摘也益漸遂潛藏三花于筆  
管來歸丹城田舍二月始種一核于花塲不旬萌三



月種一核枯死四月種一核秋有白花比三年遂大  
繁行但未知去核引絲之方爪摘核而手撚絲居亡  
何上國僧來遊東國由北道至晉州鄭天翼家天翼  
卽益漸婦翁也僧見野田草綿忽泫然泣下天翼怪  
問之僧曰故國之物不知何年移此若是之繁也流  
離歲久不覺感涕僧遂作攬車紡車教以織作之事  
於是草綿之利遍于一國以左司議侍學上書極論  
為學之方諫官李導等上書爭私田不可復益漸時  
官左正言與李穡李琳禹玄寶稱病不署名大司憲  
趙浚奏曰益漸以賢良徵拜諫官誠宜敷陳治道以



補聖明而反迺依附宰臣專事苟容請罷之教曰可  
益漸退隱于智異山中自号愚隱教授生徒丁母憂  
居墓三年時值倭寇陸梁人皆竄匿益漸不脫衰經  
上食如常矢死不去寇亦感其誠孝不加害得保几  
筵後又自号三憂居士蓋憂邦國之不振憂聖學之  
泯滅憂己道之不立也 明高皇帝洪武十六年癸  
亥卒辛王命按廉使呂克珣立碑于所居以旌孝行  
墓在丹城葛蘆介山 惠宗皇帝建文三年辛巳我  
太宗大王嘉其有功有行 贈嘉靖大夫叅知議政  
府事竭忠輔國啓運純誠佐翊澤重廣利貞亮功臣



江城君富民侯謚忠宣公立廟宣額 命其子孫復

役 賜祠田奴婢旌其門閭 世宗世祖成宗中宗

宣祖景宗英宗列朝俱命其子孫除役免賤 世祖

朝其後孫天奉官至判尹佯狂行乞不仕貶死于咸

興 中宗朝有刑曹叅判瑾弘文館修撰璿生貢繪

地辭連已卯之獄俱棄告身歸田里而死自是文氏

之族衰而不振麗史有云蓋漸非徒有功於綿花天

理晦而復明文風熾而復振可謂東方道學之宗也

李滉撰碑記有曰晚年不仕蓋亦早見而預待之也壬

辰倭難廟宇毀壞 恩額灰燼 神宗皇帝萬曆四



十年壬子光海君四年鄉里父老道內儒生重初廟  
宇於丹城道川之上 肅宗大王三十三年丁亥道  
內儒生李東稷等上疏請額 命禮曹稟處因格而  
不施

申尚州

申潛字元亮高靈人曾祖文忠公叔舟父禮曹叅判  
從漢娶 世宗大王第十一子義昌君玗女弘治辛  
亥生潛七歲而孤伯兄高原尉沆 成宗朝駙馬也  
文雅重一時潛從學焉詞藻日進癸酉中進士別浮  
華礪名檢徧交當世之士論辨卓犖己卯中賢良科



補藝文檢閱故事賜對群臣史官輒後入先出潛進  
言曰人主言動之微史官無不謹書之後入先出恐  
有傷於紀綱之義也臣聞成宗朝有一儉人乘此  
得售其說卒為禍潛請自今史官先入後出以為常  
中宗大王可之未幾士禍作罷賢良科後入先出之  
規亦廢不行潛罷官間居辛巳與安珣等橫被罪

庭訊竟無所得謫長興府十七年志氣曠夷哦詩自  
遣丁酉量移楊州戊戌命任僊居住卜居峨嵋山  
下彈琴讀書翛然自適癸卯大臣薦材堪華國超授  
六品為司饗主簿上下教曰潛今為主簿無以試



其材改除守宰欲觀治績補泰仁縣監以興禮善俗  
育才敦學為急務時值大歉所全活數千人觀察使  
金光轍上其事 上嘉之加一階拜 宗廟署令  
明宗己酉除杆城郡守辛亥 上命揀中外莅官廉  
謹者觀察使柳智善上其清謹時潛病篤觀察使循  
舊事請罷 上下教曰潛清德已著所至盡心不可  
病罷只遞其職仍陞秩以獎之壬子起拜尚州牧使  
潛疾愈感 上眷綢重遂赴任觀察使丁應斗上荒  
政之最 上加一秩階通政甲寅卒于尚州潛風姿  
凝俊識量高雅樂善好義無有倫比世俗凡卑之論



未嘗出口遇事優遊不動聲色憂時悶俗數子至誠  
賙濟窮乏無所顧惜獎進後生隨才引誘晚工草隸  
寫蘭竹極其精妙時與親知文酒衍衍夷愉和暢風  
流動人初娶宗室唐海副守某女有二女後娶叅奉  
廬友明女無子友明子禎撰行狀

鷺島種類

鷺島種類甚多今記其方俗之名鷺之當年生而調  
馴者曰甫羅鷺甫羅者方言淡紅謂其羽毛色淺也在  
山而年久者曰山陳在家而年久者曰手陳鷺之最  
俊而白者曰松骨青者曰海東青鷺之少而似鷺者



曰獨戍伊鷲之大而能捕麋鹿者曰伽漢戍伊伽漢者方言玄也似鷲而能捕虎者曰肉德威狀兒雄大人負而行見虎則坐虎頭啄其睛似鷲而兩翎脩銳者曰蘭春掣翎而斬鵝雁亦殺鷹似鷹而眼黑者曰鷓鴣能捕鷹似鷹而赤胸白背黑眼者曰方達伊能殺鷹似鷹而小翎銳脚脩者曰浚義能捕鶉卽所謂鷄也似浚義亦似鳩而眼黑者曰盜鈴馱能捕鶉似盜鈴馱而能捕雀者曰句陳義亦曰孛南甲天將風則直上半空消搖不下孛南者方言風也卽所謂晨風也似浚義而嘴旁浚如刀刻者曰雀鷹能捕雀似



鷹而尾根有白羽者曰馬糞掠能捕雀

胡中丞

咸通六年天子使攝御史中丞胡歸厚以我鄉人前進士裴匡腰魚頂笏為輔行與王人田獻鈺來錫命曰自光膺嗣續克奉聲猷俾彰善繼之命允協至公之舉是用命爾為新羅國王仍授檢校太尉持節充寧海軍使向非變齊標秀至魯騰芬則何以致飛鳳筆而寵外諸侯降龍旌而假大司馬之如是乎故厚之復命也白時相曰自愚已往出山西者不宜使海東矣何則鷄林多佳山水東王詩以印之而為贈賴



愚嘗學為綴韻強忍愧酬之不爾為海外笑必矣君子以為知言是惟烈祖以四術開基先生以六經化俗竊思西官日覽柳氏子珪錄東國事所述政條莫非王道今讀鄉史宛是聖祖大王朝事蹟出崔孤雲崇福寺碑案唐懿宗咸通六年即新羅景文王五年辛巳也其所謂聖祖烈祖似指文聖王先王即憲安王也觀此則中國人記新羅事不獨孫穆鷄林類事而已亦有柳珪所錄新羅王睿製煥然不獨善德女主獻詩太宗而已亦有景文王與胡中丞唱酬又孤雲所撰白月碑有曰憲康大王親製深妙寺碑蓋憲



康王文章為新羅五十五王之首贈智證大師四言  
詩曰挽卽不留空門鄧侯師是支鶴我非趙鷗柳惠  
甫撰三韓詩紀漏此詩事詳孤雲所撰寂照塔碑

昭炤

新羅慧昭大師哀愍王賜号也初為慧照避炤智王  
廟号改為慧昭炤與照同又有智證大師不避智證  
王廟号何也且智證塔号無寂照亦不避炤字

片 牆籬複姓

南原有牆籬複姓其自稱及人呼之必曰談鬱方言  
牆訓談籬訓鬱故也以文字書之則稱牆籬此萬姓



統譜奇姓譜中所未有之姓也

魍魎防箒

任實縣梧原有魍魎防箒世傳馬府院君微時嘗釣魚于野川得一異石五色瓊瓏歸而寶藏夜半有魍魎累萬蒲伏哀乞曰鬼王失符足下得之願還亟贈馬曰符是何物鬼曰俄者所得異石是也馬愈益不許鬼曰足下如有所欲為謹當惟命火速如願馬曰汝若一夜之間以石箒梧原大川可還汝符鬼唯唯而建明朝見之衆石磊磊箒若繩截其夜群鬼畢集馬遂還石符又燹黃豆一斗以酬鬼勞鬼分食各一



箇而最末一箇不足一鬼獨不得食怏怏而去因毀  
拔筭中間石數尺許馬遂聚石補其缺年年霖雨至  
于今四百年筭不壞如新惟人補處隨補隨壞蓋此  
筭為任宗南原之大利可灌田數千頃馬府院似是  
開國功臣馬天牧也

烏鰾魚墨

姦騙之徒與人作券以烏鰾魚墨或魚油墨寫之後  
必成訟出考其券則已作沒字碑不可憑矣以海水  
漬之則字復宛然云

終丹



英宗大王丙戌山陰縣村女終丹六歲生子 上遣  
御史具庠按覈刑配所奸男子而配終丹及所生子  
于黑山島改山陰為山清余到山清問于禹座首某  
禹曰終丹初生三十日已通癸水三歲陰有毛至六  
歲不甚壯大惟如平常六歲兒懷孕後茁長若十四  
五歲女而面目淫蕩殊異乎童女其所生子亦甚完  
實及到黑山母子俱死終丹之母與男兄至今居於  
山清邑內云

彌陀山

彌陀山為沙斤驛主山山上有石城周二千七百九



十六尺內有三池天旱祈雨高麗辛禡六年庚申倭  
奴五百艘泊于鎮浦寇三道燒尚州府庫經京山駐  
沙斤驛三道元帥裴克廉等九將與倭戰于驛東三  
里許敗績朴修敬裴彥二元帥死之士卒死者五百  
餘人川水皆赤至今号血溪或惡其名改禰菊溪時  
監務張群哲守山城爲倭所屠倭因向南原駐引月  
驛爲我 太祖所殲城廢不修 成宗朝夏竦今不  
復修李詹詩雲峯山下秋風早日澹天寒木葉槁是  
時島夷敗我軍血濺咸陽原上草兩府元帥陣前亡  
士卒微軀難自保悲笳數聲丈夫淚誓雪國恥及未



泣下落  
雨字

老征南諸將誰無軍旌旗緩緩回征道俞好仁詩沙  
斤城畔起陰雲坤靈夜泣紛紛庚申萬鬼啾啾哭似  
恨當時張使君

權松溪

權松溪應仁居星州退溪先生弟子也退溪沒應仁  
作挽詞群弟子以應仁庶孽也故斥而不用應仁以  
竿揭其詞挿于門外露哭三晝夜夜必竿上放瑞光  
群弟子異之試許用其詞應仁壯大魁梧異於凡人  
能文章七八歲京三使馬島嘗言于退溪曰先生少  
止澹薄風月濃黑草書則先生之道德益高風月者



實之竹葉海等上核松溪ノ象ニ核石何事正溪  
訪事ノ行ヒシ  
之世少止溪海凡月遠愧是其書のト曰ヘルコトヲ  
記ス  
其正溪ノ古書アリテト云ヒコトアリ



東俗所謂詩也庇安金進士得厚云

垣柵雞長煖

余嘗有詩雞溫暝桀連登後馬寂霜槽快齧餘人問  
雞何有溫或有故事來歷耶余無以應後見王半山  
詩垣柵雞長煖蓋與余詩同其意也

有磷驛土山

三嘉有磷驛土山頂往往有大塚如廣州倭塚問諸  
土人則曰此新羅塚也假使新羅時葬禮如此則諸  
州郡宜皆如此而獨此為然意者三韓戰伐時京觀  
也



# 大朗慧

新羅大朗慧和尚姓金氏武烈大王八代孫祖位韓  
縈名周川父範清儉士母華氏入中夏遊佛光寺問  
道白香山空門友如滿如滿有慚色曰吾闕人多矣  
罕有如是新羅子他日中國亡禪將問之東夷耶去  
謁麻谷寶徹和尚服勤無所擇衆目曰禪門庾異行  
徹公一日告曰昔吾師馬和尚訣我曰春鶯繁秋棠  
寡攀道樹者非所吒今授若印異日徒中有奇巧者  
封之東流之說蓋出釣讖則彼日出處善男子根殆  
熟矣師言在耳今付若印武宗會昌五年沙汰僧尼



敕外國僧歸本國遂隨使舶泊于錦城郡住熊川寺  
文聖大王手教優勞勅寺牘為聖住憲安王嗣位乞  
言大師對曰孔子對魯公之語著在禮經請銘坐側  
景文王卽位咸通十二年召大師至京師王拜為師  
君大人世子暨大弟相國羣公子公孫環仰如一如  
古伽藍繪壁面寫出西方諸國長侍勃陀樣式王曰  
弟子不佞少好屬文嘗覽劉勰文心雕龍有云滯有  
守無徒銳偏解欲詣真源其般若之絕境則境之絕  
者可得聞乎師對曰境旣絕矣理亦無矣斯印也默  
行爾王曰寡人固請少進爰命徒中錚錚者更手撞



擊菴容盡聲剝滯祛煩若商飈之剷陰靄於是王大  
喜命以尚州深妙寺請禪那別館乾符三年王不豫  
召大師師曰山僧足及王門一之為甚知我者謂聖  
住為無住不知我者謂無染為有染乎然顧與吾君  
有香火因緣叨利之行有期矣盍就一訣王薨憲康  
王卽位泣命王孫勛榮諭旨曰韋大師無遠適師對  
曰古之師則六籍在今之輔則三卿在山僧何為者  
鯉蠹桂玉哉就有三言庸可留獻曰能官人翌日挈  
山裝鳥逝乾符帝錫命之歲今國內舌抄有可道者  
貢興利除害策別用蠻牋書言荷天寵有所自因垂



益國之問大師引出何尚之獻替宋文帝心聲為對  
王覽之謂介弟南宮相曰三畏此三歸五常均五戒  
能踐王道是符佛心大師之言至矣中和西狩之年  
王謂侍人曰今聞天子蒙塵趣令奔問官守勤王加  
厚歸佛居先將邀大師必叩外議遂卑辭台師面供  
饌手傳香秉鵠尾爐締生生世世緣加法彌曰廣宗  
命羣臣賦送歸之什臨別王拜曰昔文考為舍瑟之  
質今寡人忝避席之子繼體得崆峒之請服膺開混  
沌之源王雅善華言出口成儼語如宿構云師退謂  
王孫蘓判鑑曰昔人主有有遠體而無遠神者而吾



君備人臣有有公才而無公望者而吾子全國其庶  
乎定康王卽位兩朝寵遇帥而行之使緇素迎之辭  
以老病將化往訓于衆曰已過中壽難逃大期我  
儂遠遊爾曹好住告訣才罷惻然而逝僧臘八十九  
時唐僖宗文德元年戊申也真聖女王聞之震悼弔  
以書賻以穀越二年攻石封層塚蔭蔭戒弟子武州  
都督蘓判鑑執事侍郎寬柔沮江都護咸雄全州別  
駕英雄皆王孫也遂與門人昭賢通賢慎符議請贈  
謚銘塔教曰可旌命王孫夏官二卿禹珪名桂苑行  
人侍御史崔致遠至蓬萊宮珠箔外命曰聖住大師



真一佛出世今追謚曰大朗慧塔曰白月葆光汝嘗  
西官繇梁錦歸顧文考選國子命學之康王視國士  
禮待之若宜銘國師以報之使中涓出大編如椽乃  
門弟子所獻狀也致遠遂撰碑師性恭謹語不傷和  
氣諭生徒曰彼所吸不濟我渴彼所嗽不救我饑盡  
努力自飲且食凡所營葺役先眾人每言祖師嘗踏  
泥吾豈暫安拙崔致遠論曰昔武烈大王為乙祭時  
為屠瀝貊乞師計將真德君命陞觀昭陵皇帝願奉  
正朔易服章天子嘉許廷賜華裝授位特進一日台  
蕃王子宴大置酒堆寶貨俾恣篇所欲王乃不觴禮



以防亂繒綵智以獲多文皇目送而歎曰國器及其  
行也以御製并書溫湯晉祠二碑暨御撰晉書一部  
賚之時蓬閣寫是書裁竟二本上一錫儲君一為我  
賜復命華資官祖道青門外自茲吾土一變八世之  
後大師西學而東化加一變至於道先祖平二敵國  
俾人變外飭大師降六魔賊俾人修內德得千乘主  
兩朝拜起四方民萬里奔趨動必願使之靜無腹非  
者庸詎非應半千而顯大千者歟余取孤雲所撰碑  
刪節為新羅三名僧傳

智證



智證大師姓金氏王都人獬道憲字智說父贊環母  
伊氏初母夢一巨人曰僕昔勝見佛季世為桑門以  
真惠故久墮龍報報既矣當為法孫故佗妙緣願弘  
茲化因有娠長慶甲辰生儀狀魁岸語言雄亮九歲  
喪父殆毀滅有追福僧憐之喻曰幻體易滅壯志難  
成昔佛報恩有大方便仍感悟報哭白母請歸道不  
許聞踰城古事卽亡去就學瑞石山一日心驚俄聞  
母疾歸省十七歲受具始就壇覺袖中神光熠熠然  
探之得一珠景文大王寓書曰伊尹大通宋纖小見  
以儒譬釋自通陟遐句也岩居頗有佳所未可擇矣



無惜鳳儀妙選近侍中可人鵠陵昆孫立言為使既  
傳教已因攝齊焉師荅曰修身化人舍靜奚趣咸通  
五年端儀長公主以邑司所領賢溪山安樂寺請師  
住持獻康大王召見師于月池宮而問心時纖蘿不  
風濕樹方夜適覩金波之影端臨玉沼之心大師俯  
而覬仰而告曰是則是餘無所言王洗然契悟遂拜  
為忘言師請少傳對曰謂牛戴牛所直無幾以鳥養  
鳥為惠不貲請從此辭王喟然以韻語歎之曰挽旣  
不留空門鄧侯師是支鶴我非趙鷗中和壬寅泊然  
而逝僧臘五十九王賜謚智證禪師塔碑寂照命崔



致遠撰碑致遠曰始大成也發蒙乎梵體大德稟具  
乎瓊儀律師終上達也探玄于惠隱嚴君受默于楊  
孚令子法胤唐四祖為五世父東漸于海遡遊數之  
雙峯子法朗孫慎行曾孫遵範玄孫惠隱末孫大師  
也朗大師從大醫之大證杜中書正倫纂銘云遠方  
奇士異域高人無憚險道來至寶所則掬寶歸止非  
師而誰第智者不言復藏于密能探秘藏唯行大師  
然時不利道未亨乃浮于海聞于天肅宗皇帝躬賜  
天什曰龍光渡海不憑筏鳳子沖虛無認月師以山  
鳥海龍二句為對有深旨哉東還之傳至大師畢方



之後斯驗矣

慧昭

慧昭姓崔氏其先漢族隋師征遼多沒驪貊今為全州金馬人也父昌元母顧氏氏嘗晝假寐夢一梵僧謂曰吾願為阿彌之子目寄琉璃罌未幾娠禪師既誕為戲必焚葉為香採花為供或西向危坐未嘗動容及長志切反哺家無斗儲裨販婢隅為贍甘滑之養貞元二十年為榜人隨貢使渡海行至滄洲謁神鑑大師師怡然曰戲別匪遙喜再相遇遽令染削頓受印契師形兒黥然衆不名而目為黑頭陀元和五



年受具於嵩山少林寺琉璃壇聖善前夢宛若合符  
遂入終南餌松實而止觀大和四年來歸興德大王  
飛鳳筆迎之曰彌天慈威舉國欣賴寡人行當以東  
鷄林之境成吉祥之宅也始懸錫於尚州露岳長柏  
寺方丈雖寬物情自隘乃步至康州智異山仍於花  
開谷故三法和尚蘭若遺基纂修堂宇開成三年慈  
哀大王卽位降璽書別求見願師曰在勤修善政何  
用願為使復于王王聞之愧悟以師色空雙泯定慧  
俱圓賜號為慧昭照字避聖祖廟諱易之也仍貫籍  
于大皇龍寺徵詣京邑岳立不移遂歷銓竒境得南



嶺之麓經始禪廬大中四年正月告門人口萬法皆  
空吾將行矣無以塔藏形以銘紀跡臘七十七子時  
天無纖雲風雷歛起虎狼弭咽俄而紫雲翳空空中  
有彈指聲會筭者無不入耳師性不散樸言不由機  
朕煖繆賡食甘糠麤每有王人來躬傳命遙祈法力  
則曰凡居王土而戴佛日者孰不傾心護念為君野  
福亦何必遠紆綸言於枯木朽株或有以胡香為贈  
者則以尾載糠灰不為丸而燭之曰吾不識是何臭  
處心而已復有以漢茗為供者則以薪爨石釜不為  
屑而煮之曰吾不識是何味沾腹而已守真忤俗皆



此類也雅善梵唄金玉其音側調飛聲爽快哀婉至  
今東國習魚山之妙者競如掩鼻師泥洹越三紀門  
人以陵谷為慮扣不朽之緣於慕法弟子內供奉一  
寺于楊晉方崇文臺郎鄭詢一勒石是請獻康大王  
追謚真鑑禪師塔弔大空虛仍許篆刻龜未戴石龍  
遽昇天定康王卽位以招提之門臨復澗乃鈞題為  
雙溪命崔致遠為銘

惠風詩

歲戊戌余與朴在先入燕是年秋柳惠甫遊瀋陽庚  
子朴燕岩遊熱河每醉餘談次朝惠甫中途而止出



寅南士樹李聖緯入燕余來沙郵未暇作別詩泗川  
宰金錫汝胤子思玄歷訪沙郵誦傳惠甫別士樹聖  
緯一絕曰年年十月漲行塵援著我衣鴨水濱人盡  
到燕吾到瀟一千餘里不如人

### 伽倻山記

壬寅二月十八日早飯發行居昌茂村四十里點心  
加祚村四十里秣馬陝川海印寺三十里宿茂村卽  
金泉屬驛也行十里過居昌府治晡時到加祚倉古  
加祚縣也稍稍有瓦家行五里地名龍山伽倻山路  
夾口也東崖有九日書齋石立川行頓有幽趣綠溪



以上石皆馬牙皴樵人接踵而下如駭鹿奔麋樹末  
夕照澹紫有數十家懸厓而居號末丁村行二十里  
人語天半馬嘶霞外始逾一嶺地勢低下日落淒寒  
行二三里海印寺僧數三輩領村童六七擔籃輿來  
待乃坐輦行二三里又有一村亦曰末丁村人四五  
持炬引路輦人跳澗踏石捷於猿猴星光漏樹水聲  
撼炭行十許里寺僧十五六持炬來迎迥如濕螢到  
寺歇于窮玄堂僧供蜜漿餠子棗柿之屬又供夕飯  
石葺古叟馬蹄疏鹿角菜皆可口燃燭觀大寂光殿  
釋梵學稍慧可語索見寺志而宿○十九日夜雨早



飯發行星州楊亭村四十里點心星州牧三十里宿  
佛堂凡九僧寮凡十二自古遭火燒甚頻庚子正月  
又火佛堂三僧寮九今者始建僧寮而佛堂未構大  
寂光殿卽古毘盧殿而弘治中賜今名僧言是新  
羅時所建按志卽世祖諭監司改構不久而頌  
仁粹大妃命改建任士洪所記如此塔二十級堂四  
十六間甚宏敞雄麗毘盧坐佛可二丈左右二佛差  
小香爐二坐烏銅銀花嵌以梵字明潤奇巧不知何  
代之物有鼓一面桶塗倭硃僧言此是哀莊王時龜  
皮所鞣而以余觀之明是牛革仍索天將笠子則僧



言火于窮玄堂北有普眼堂卽藏弃八萬大藏經南  
北二閣俱十五間廣各三間總九十間中設三層架  
滿插經版鱗編羽柳洵是壯觀版長可周尺一尺半  
廣可二尺只有邊格無烏絲十二行十四字字如基  
子雖楷精無可取法版俱髹漆不甚光潤四隅薄銅  
裝釘按古蹟志哀莊王時陝川里胥李居仁入冥府  
逢三目王發願歸告于王王命雕版于巨濟島中移  
藏于海印荒唐不可信毘盧佛左積世祖朝所榻  
經卷試括二卷下方一刻癸卯歲大藏都監奉勅雕  
造一刻甲辰歲按古志哀莊王丁卯開雕與此矛盾



耳哀莊王唐德宗十六年庚辰立十年唐憲宗元和  
四年己丑為憲德王所弑元無丁卯歲高麗有八癸  
卯八甲辰似是麗朝所雕而未知何代若使我盡閱  
經版則必知其緣起而不可得也版端冒格皆刻某  
字第以十字文某經幾卷幾張有時張作丈此必是  
我朝人補刻也蓋與中國毛氏汲古閣書籍版可  
以相埒世言蟲鳥不敢棲塵埃無所罣而北堂前東  
第一楹卽黃榆木大可三抱有蠹因窹成房余試執  
一二版塵煤浣手人之喜說謊類如是北堂中一間  
亦安一佛堂西有真常殿弘治年間建後壁垂織成



千佛錦障佛如小指皆碎如蝶衣僧言是月支國物  
余笑而唯唯堂中左右有塔屹立石雕金塗右三十  
三級左二十級右北壁下安羅末希朗禪師木雕像  
面手髥漆筋骨成削襟披胸現乳間有竅容櫻或象  
伊人生時中腕灸痕或是雕造多年腐蝕成竅世傳  
此穿胸國人然常見三才圖會穿胸國貴人必以長  
杠貫穴兩人擔之若籃輿然今希朗之穴僅容筆管  
假令爲穿胸國大貴人貫而擔之則杠折而不可動  
矣洵如傳者之言則巨無霸是龍伯國人昭烈帝是  
長臂國人湘東王是一目國人王德用是昆侖國人



希朗之旁有崔孤雲画像巾袍雖是唐裝顏髮恐不  
如是版俗西有高阜曰學士臺登此可攬海印全局  
左面右抱北高南低而急澗前奔紙閘穀碓沿水基  
置澗平高窅又有精藍名曰願堂僧言袁莊王駐蹕  
之地也仍坐藍輦出紅霞門峭峯削壁夾澗而起紅  
流洞落花潭懸瀑停滙白飛綠沈樹石俱怒烟霞欲  
皺蒼壁鐫名令人敗興袁中郎所謂青山白石無罪  
受黥諒非虛語東踰數嶺十許里始跨馬向星州黑  
石白石萬萬散落往往產白土可燒磁器午到星州  
楊亭村有檜洲書院即鄭寒岡俎豆之所而明日為



春事院長裴欽祖使齋任持肴酒來饋店舍致語以  
為齋居不可見客余亦謝以主人齋居客不敢就見  
行到十里有西川書院卽寒岡之兄西川府院君崑  
壽也兄第一州俱享血食真希有也星州治西有關  
侯廟余入謁仍向店舍宿○二十日雨早飯散行河  
濱店四十里點心大丘三十里宿細雨中渡洛東江  
江流泯泯南岸斗起橡櫟雜植星州古之碧珍伽倻  
山川平遠澹沲人烟林樹可堪入畫沿琴湖逶迤南  
馳平疇曠野一望如砥大丘是衣食之鄉良有由也  
府城堅緻勝於全州而女牆崩剝城西北有土阜偃



如城隍蒼松翳然此所謂達城也判官洪戾元變邀  
余談藝良久而罷○二十一日陰晚晴星州茂溪五  
十里點心高靈良田二十里宿蓋余此行傳聞巡相  
十九日發右巡行到星州故余向海印寺欲於星州  
延命旣抵星州漠然無消息故因發向大丘昨日  
日暮未能行禮是日早具黑團領到客舍殿牌下  
設香案庭左右列儀仗兵房軍官我服陪教諭書  
及鄧鉞而來余於中門內西庭鞠躬祇迎校生輩奉  
教諭書安于案樂作四拜爐烟升又四拜禮訖以時  
服入營衙謁巡相歷言郵瘼良久仍還舍館始聞巡



相廿四日發右廵廿五日將期會于宜寧新反倉發  
行十里有大池名上塘塘人乘筏持竹篙採荇令人  
渺然起江湖之想渡星州茂溪津卽洛東江下流津  
崑店舍皆窳也行到良田大池旁有店舍夕氣蒼涼  
水禽踴踴○二十二日早飯發行陝川南亭店六十  
里點心三嘉有磷驛宿踰支離嶺嶺路迂回衆山叢  
沓遙望白沙一帶卽陝川郡治也郡南有江江崖古  
木和烟村落映帶去年八月初五日戌時大風雷雨  
災水急下浸官舍郡守沈戾興永攜印攀樹僅以身  
免水淹民戶男女八十餘口一時俱死收得餘骸者



才五十餘口無以飢饉令人傷心慘目沈侯捐俸救  
民鄧己之倉西行數里許石壁層疊一亭翼然俯臨  
南江名曰涵碧樓高麗安震撰記以為晉州壯元亭  
平壤浮碧樓當與此并義震忠肅王時人蓋成於辛  
酉歲作樓者廼累世勲臣上洛君胤子金侯云至我  
朝郡守柳綸重修姜希孟撰記英宗辛酉郡守趙  
侯持恒重修尤菴宋文正公撰記北岩刻尤菴所書  
涵碧樓樓石稍北有一僧住持自此以後不能記

白黑臂

咸陽有一士人持身甚謹每日必澡洗兩臂人恠問



之則曰天下事未可知吾今雖謹拙若或得罪於官  
刺袴受笞臀若垢黑愧恨當奈何後果以非罪拿致  
府庭將受笞臀色潔白異常官長歎曰臀白如彼是  
真士夫遂不下一笞而免其罪又有一士以罪拿致  
兩臀黑如煤炭不似人膚官長將高聲數罪因發笑  
而止不下一笞仍又免罪然洗臀士人持身甚謹可  
以警俗

青莊館全書卷之六十八

庚午春上半從弟兼  
秀未重書中半義洞  
金生  
半金第民城盛汝書  
書下



青莊館全書卷之六十九

寒竹堂涉筆目錄下

化姓雲氏

噓氣射犬

琉球使

舍方知

吉治隱

秋江論治隱圃隱

治隱辭太常箋

宋史初到我國

李贊成該洽

金處士孝行

花喙蚊

佔畢齋遊頭流山

雲山筆錄

畚

日本之俗

三計



烟肉酒

明氏事蹟

嚴川古蹟

瀘溪廟庭碑

君子寺

羅鼎石刻

慎權兩處士

咏蝶詩

石湖集

林將軍影

新羅方言

達句長韻

睡

新羅始置驛

蟹朝魁

接人之方

忍

毛詩講義

義信公主

蛟龍城北山如戟



商山饌



青莊館全書卷之六十九





青莊館全書卷之六十九

完山 李德懋 懋官 著

男光葵 奉杲 編輯

德水 李晚秀 蕙隣 校訂

寒竹堂涉筆 下

化姓雲氏

晉州有化姓自言貫驪州洪大丘元變有哀乳媪雲氏詩

噓氣射犬

鄭仁弘兒時學于安陰林葛川當歲除日葛川與群



弟子守歲至夜半皆就睡惟仁弘危坐達朝肌膚多  
爪掐痕血跡斑斑蓋苦肉而警睡也葛川家多美婢  
一日選最艷者使之昵近于仁弘讀書之室竟夜讀  
書自如一不擡眼葛川以為仁弘二事雖過人殊非  
常情必不祥遂斥之後果八耄伏刑都市仁弘既老  
召子孫謂曰吾老矣欲試精力須呼一犬來犬蹲于  
仁弘面前數步許仁弘默然端坐暗噓精氣移時犬  
眩暈旋轉不能暫停遂閉戶仍問犬斃否子孫對曰  
犬已逃矣仁弘歎曰吾噓氣射犬而犬不死其於吾  
棄何世號仁弘為伽倻老狐陝川尚有後孫家藏其



畫像近世監司某聞之使其後孫焚之火焰赭然而  
西幅拂拂飛颺者三四頭面終不燬監司聞而悔之

### 琉球使

琉球使 祖宗朝來貢路由慶尚道似應抵于日本  
薩摩州因隨日本使者達于我國也佔俾齋仁同客  
舍記曰仁同濱于洛之東涯據嶺南中路之要衝日  
本琉球九州三島之夷奉琛重譯而至者朝迎夕送  
四時不絕佔畢齋又有鸚鵡詩琉球王遣使獻鸚鵡  
一隻見之於東都有作珍禽隻影到東隅幾伴檣烏  
日夜馳嗚咽祇應思故土嬋姁還欲學癡姬翠衿自



惜菱花照紺趾難辭玉鑲縻爭似九苞丹穴鳳不言  
猶瑞太平時又琉球使以水滴餉上洛君其制甚巧  
上洛令余代作以謝山腹橫穿海眼明花甕誰幻玉  
蟾精從今添得文房友濡筆將書內景經

舍方知

佔畢齋集載舍方知事舍方知私賤也自幼其母為  
女兒服傅脂粉學剪製及長出八朝士家多與女侍  
通士人金九石妻李氏判院事純之之女也寡居引  
舍方知託以縫衣晝夜與處十餘年天順七年春司  
憲府聞而鞫之逮訊其素所通一尼尼曰陽道甚壯



令女醫班德捫摸之果然也 上令承政院及永順  
君溥河尉城鄭顯祖等雜驗之河城之妹為李氏媳  
婦河城亦吐舌曰何其壯也 上笑之特令勿推曰  
恐污鱉純之之家也將舍方知與純之區處純之只  
杖十餘送于畿內奴子家既而李氏潛召舍方知還  
純之卒後尤縱恣不已今年春宰樞因燕語白之  
上杖配舍方知于新昌縣余聞之賦二首云絳羅深  
處幾潛身脫却裙釵便露真造物從來容變幻世間  
還有二儀人男女何煩問座婆妖狐穴地敗人家街  
頭喧誦河間傳閨裏悲歌楊白華嘗見一野史舍方



知為陰陽俱具人此只稱男子女服可八五行志

吉治隱

吉再字再父號治隱或稱金烏山人善山府海平縣人也父知錦州事元進母兔山士族金希迪女至正十三年癸巳生于鳳溪里元進仕為寶城大判擢金氏赴任托再于外家時年八歲一日遊南溪作石鱉歌以寓思母之意號泣哀切隣嫗竊視泣而傳之里中男女莫不感淚元進遊宦松都又娶軍器監盧英女遂與金氏疏金氏徃徃有怨語再諫曰婦之於夫雖有不義不可非之人倫之變聖所不免處之以正



以俟天定可也母感其言不復怨語年十八學于商  
山司錄朴資因覲父子松都盧氏始不慈於再後感  
再至孝待之如所生子再遊鄭夢周李穡權近之門  
始聞性理之學甲寅中生員試癸亥中司馬監試甲  
子元進卒再遵聖制終三年丙寅中進士補清州司  
錄不赴是時我國家未受命太宗大王在潛邸  
八學再以同里閑從遊讀書甚歡屢遷諄諭博士成  
均博士太學諸生及摺紳子弟請學者多已已拜門  
下注書知高麗將亡庚午辭以母老棄官歸善山夢  
有一僧唱一句曰古今僚友身新變再聯之曰天地



江山是故人覺而續吟曰太極真君應許我仁心不  
老自青春辛未除鷄林安邊教授俱不赴聞驪興訃  
方喪三年事母金氏致誠披衾斂枕晨夕不懈妻孥  
請代之再曰吾母老矣後日雖欲為母服役何可得  
乎遠近學者四集日以百數閑閱之齋處于上齋鄉  
俗之族處于下齋課其勤懶樂以忘憂自洒掃應對  
至蹈舞咏歌不使躡等生理蕭然艱於供俱知郡事  
鄭以吾給梧桐閒田以資養焉庚辰 太宗大王居  
儲位召之不起州官督令就道乘傳詣京師 太宗  
啓恭靖太王授再太常博士再不詣 闕謝 恩



乃上書 太宗曰昔日得與 邱下讀詩泮宮今者  
召臣不忘舊也然委質偽朝蒙其親試且受爵命不  
宜復仕 盛朝以累名教 太宗曰子之所言義難  
奪志然召之者我也官之者 上也宜辭於 上也  
再遂上書曰女無二夫臣無二主乞放歸田里終養  
老母 上御經筵問知 經筵事權近曰吉再抗節  
不屈未審古人何以處之近對曰嚴光不屈光武從  
之再若求去則不如使之自盡其心之為愈 上嘉  
之優禮遣歸 命復其家壬午母卒一從文公家禮  
不用浮屠法長子師文死服斬衰郡事李揚問其貧



給粟谷園田以饒生養再曰凡物有餘莫保其終乃於園田僅留家用餘悉還之監司南在為營家廟再行朔望叅禮四仲時享出辭反告無敢或虧妻申氏亦嫺祀儀菜盛之具隨時取辦叅佐拜揖無不中禮婦翁中郎將申勉之卒其孫存養從軍未還再曰余於申家受恩隆摯乃服緦麻代為喪主不食菜果鹽醬百有餘日以待存養之來權近朴賁之喪俱心喪三年季妹適千戶方思桂見棄無所歸再迎置家中思桂後欲迎歸再曰棄以不義迎又無禮歸必復棄遂不歸之友愛愈篤及妹死再曰喪有無後無無主



使弟久爲之主服暮年戊戌 世宗大王卽位命官  
其子師舜師舜將赴 召拜辭于再拜戒之曰君先  
乎臣三代以後蓋罕聞也汝在草萊君先召之其爲  
恩義非他尋常爲臣之比汝當效我向高麗之心事  
汝朝鮮之主師舜謹受戒再拜而去再居家淡泊安  
靜輕財重義留心忠孝謹於喪祭每值親忌不食一  
粒曰古人謂忌日爲終身之喪安忍哺啜遂垂淚終  
日宗族之喪必服家禮所制之服隣有喪微者必啜  
粥不嘗飽也常語人曰人之晝有錯於言行夜不存  
心耳夜必靜坐不言中夜而寢鷄鳴而起具冠衣謁



祠堂及先聖與弟子相揖退于書室講學辨疑竟日  
忘倦務合程朱之旨市井之語異端之書未嘗接於  
耳目大小官不先加禮不八公府嘗以明道學闢異  
端為急務緇流之感悟而反本者數十人弟浮屠久  
亦感而歸儒中生員試經術之士出於門下者不可  
勝記烈女樂哥鳳溪人也嘗誦烈女不更二夫以自  
勵或問之曰汝鄉曲賤女也何以誦此言哥曰吾同里  
古注書嘗曰忠臣不事二君烈女不更二夫吾是以  
知之再家臧獲誦詩書以相眷杵已亥病革妻申氏  
請招師舜再曰君父一也既往君所聞訃而至可也



烏山下  
落吳字

因謂女婿李孝誠曰我死一依文公家禮言訖而卒  
年六十七有二子三女治隱集三卷行于世墓在金  
烏山 世宗大王贈再左司諫大夫 命旌其閭有  
金烏山二書院及中流砥柱碑趙光祖學於金宏弼  
宏弼學於金宗直宗直之學出於其父叔滋叔滋學  
于再再之學得於鄭夢周夢周寔為東方理學之祖  
隆慶丁卯 詔使許國魏時亮來問東方孝子節義  
及孔孟心學之人禮曹判書李滉以孝子五人忠臣  
五人烈女五人孔孟心學十六人為對再在心學之  
列有曰志操高潔學問醇正門人司憲府執義朴瑞



生撰行狀事見三綱行實輿地勝覽權近楊村集金  
宗直彞尊錄成覩慵齋叢話柳希春續蒙求希春曰  
質美而學粹好義而宗禮孝於親忠於君隆於師盡  
臣子在三之節旣以此終身又以此教人雖古之醇  
儒不是過也

秋江論冶隱圃隱

南秋江孝溫過金烏山詩有曰鴻毛命輕義山重公  
與達可知此理達可身輕二姓王杞樸寸朽鑑中批  
公身所委惟一君真知獨行誰與比秋江此詩蓋許  
冶隱登進士拜注書俱在辛朝而恭讓初年棄官而

自註之  
字似輕字  
也



歸圃隱仕于辛朝王朝故以為身經二姓未免朽珷  
之譏輿地勝覽曰吉再上書 太宗曰於辛朝登科  
筮仕及王氏復位卽歸于鄉若將終身記舊徽名欲  
上謁卽還從仕非志也冶隱此語洵如秋江詩只事  
辛氏一姓至如恭讓王不欲臣事况我 朝乎然冶  
隱上書畧載于門人朴瑞生所撰行狀有曰委質偽  
朝不宜復事 盛朝三綱行實亦載上書有曰擢第  
辛朝臣無二主權陽村次南龜菴詩序亦引上書與  
行狀同而無王氏復位卽歸于鄉一段無乃諸書皆  
拔之勝覽獨載而秋江從之歟若如世傳元耘谷詩



中語則秋江苛論圃隱而冶隱之分辛朝王朝未知如何然久遠之事祇可傳疑而已偶讀冶隱集而記

冶隱辭太常箋

吉治隱辭太常博士箋殘生險釁已退鄉閭 罷渥殊優復沾朝秩顧僭踰之已甚可冒昧以敢當遂以力辭期於 願可竊觀古人之跡皆患遭遇之難不事王侯豈可以沽節因為臣僕非徒以亂倫實闕出處之宜庶有名教之補伏念臣性資昏蔽門地孤寒當捷科於前朝而歷職於門下既乃為臣而委質固當戮力而盡忠丁偽宗覆亡之時既不能捐軀畫邑



及真主奮興之後又不能辭粟首陽名義以之俱  
淪清節自茲兼撓所宜加一戮於微命將以愧二心  
之人臣豈意亡國之賤俘獲需盛朝之優渥既惠  
之以首領又耀之以衣冠天語丁寧特頒駟召  
之寵官資清顯遽陞太常之班是宜盡瘁乎餘生庶  
幾少酬乎鴻造顧思進退之行止實係名教之重  
輕臣雖厚顏而冒榮人必銜目而指笑伏望離明  
曲照乾造無私憐臣不移之忠諒臣難奪之志復還  
古里俾保殘齡則上遂獎節之名下得事君之義謹  
當棲遲幽壑沐浴恩波地久天長倍祝無疆之壽



夙興夜寐益殫不二之心又有辭箋及上宰相啓世傳以為治隱所撰而或云後人擬撰

宋史初到我國

我朝累請宋史于皇明而不得端宗朝付奏于聖節使黃致身始得賫來世祖時在潛邸白端宗告于宗廟錫致身鞍具馬加從官一級致身翼成公喜子官判書謚胡安

李贊成諡洽

李贊成坡字平仲文孝公穀四世孫文烈公季甸子嘗為承旨世祖召見便殿引其手以龍顏摩其



面時 睿宗侍坐 上顧謂曰此他日汝臣也其勿  
忘遂命親酌以飲之 睿宗朝拜禮曹判書一日八  
侍 經筵退食賓廳 上使中書賫烏犀帶以賜曰  
深嘉卿典禮三載無有過舉且供職之暇能不忘經  
史遂超加崇政臺諫文論 上下批曰論人不論級  
乃予平日之志坡素稱該識典故儀禮尤其所長凡  
朝廷大禮古制雖存而疎簡可疑者必商度古今務  
合於理壬寅南至 命制黃鍾管實灰候氣氣至  
灰飛聰明絕倫善於談論性理之原及歷代治亂官  
之亶亶東人氏族世代雖微者皆辨其支派高麗諸



科至于我

朝某榜某壯元某第幾名枚舉不誤一

人

金處士孝行

金處士克一金海人父義興縣監湑克一幼有至性父閒居鄉里凡有出必奉扶屨不離跬步父晚年畜二妾母朴氏意不協往往不食克一年才八歲亦不食待母飯始飯父日以琴歌飲博自娛克一必手具酒食與妻相戒思所以悅父之心妻病疽良苦吮其血而愈母卒既葬距家三十里廬其側每朝夕奠訖必徒步來省父而返隆寒暑雨不少懈父卒哀毀



逾前喪晨夕伏墓虎來不避服闋益虔祭祀得異味  
不薦不敢食雖倉卒未嘗坐父母平日之坐事二庶  
母加於父在時及死槨祭盡禮心喪至期性恬靜不  
求仕宦外舅府尹李暕勸出仕辭以親老不願一日  
離側淨掃一室整冠危坐讀小學書教子弟必補張  
公藝以勉之與里中人脩睦族契禍患相恤昏冠相  
慶春秋吉日徵逐宴遊鄉隣執反之死弔賻如禮不  
進酒肉雖婢僕賤微亦復如之故一旬肉食不過二  
三日年七十六卒 朝廷命旌其閭子孟官執義驥  
孫駟孫孟之子也



花喙蚊

范石湖咏蚊用花喙二字余來沙郵六七月之間夜則蚊群因緣簾隙點次壁隅果腹晶晶不知其數使童子秉燭撲滅少選又來嚙膚不可堪耐其為狀也翅脚細弱而喙如象鼻立必拄喙翹揚後脚不審所謂喙如花也麻蚊最毒竹蚊差歇余直搗文院院壁多蚊八九月不復嚙膚細看坐壁者則箇箇喙端蓬勃如蓮花始覺花喙之蕭譬後讀楊升菴丹鉛錄有霧滃而鱗鰲枯露下而蚊喙坼之語古人之檢驗物狀無細或遺如是精微



佔畢齋遊頭流山

佔畢齋為咸陽郡守壬辰仲秋同俞潛溪好仁曹梅  
溪偉遊頭流山有遊錄今畧記之戊寅歷巖川憩花  
巖至地藏寺舍馬策杖一里許有巖曰歡喜臺其下  
千仞俯見金臺紅蓮白蓮諸剎訪先湟菴新湟菴抵  
古湟菴日已曛議論臺在其西有石窟老宿優陀居  
之嘗與三湟僧論大小乘頓悟仍以為號余試險極  
勞熟睡已卯黎明行度一岡此九隴之第一也連度  
三四得一洞府寬閒輿遽行二十里達于義谷村度  
九隴由山脊行不數里循脊南乃晉州之地抵清伊



堂以板為屋自此至永卽岵道極懸危日已過午始  
登岵到此仰視天王峯永卽新羅花卽之魁領三千  
徒遨遊山水嘗登此峯故以名少年臺在峯側蒼壁  
萬尋山之東西谿谷無雜樹皆杉檜松栝槁死骨立  
者三之一其在岡脊者因於風霧枝幹皆左靡拳曲  
雲髮飄颻歷躡巔翳有船巖登中峯戴土而端重  
詣聖母廟三間板屋所謂聖母石像項有鼓回太  
祖捷引月之歲倭登此峰斫之而去後人和黏屬之  
釋迦之母摩耶夫人也嘗讀李承休帝王韻記聖母  
命詵師注云今智異天王乃指高麗太祖之妣威肅



王后也高麗人習聞仙桃聖母之說欲神其君之系  
創為是談承休信之輩之韻記日且昏陰風橫吹嵐  
霧坐八衣冠皆潤枕藉祠內寒氣徹骨夏襲重綿庚  
辰先遣從者於香積寺具食石砒滑甚下數里許有  
鐵鎖路甚危穿石穴而出投香積無僧已二載出門  
前盤石望薩川蜿蜒而諸山及海島或全露或半露  
辛巳曉日出霞彩映發遂促晨鋪徑往石門八聖母  
廟時因新霽四無纖雲是山自北而馳至南原首起  
為般若峯東迤幾二百里至此峯更峻拔北蟠而窮  
焉雉堞若曳者咸陽之城白虹橫貫者晉州之水青



螺矗立者南海巨濟之群島若山陰丹谿雲峯求禮  
河東皆隱於巖積之中山之在北而近曰安陰黃石  
曰咸陽鷺岩遠曰咸陽德裕曰公州鷄龍曰錦山走  
牛曰知禮修道曰星州伽倻東北而近曰山陰皇山  
曰三嘉紺嶽遠曰大丘八公曰安東清涼在東而近  
曰宜寧闍嶺曰晉州集賢遠曰玄風毗琴曰清道雲  
門曰梁山圓寂東南而近曰泗川卧龍在南而近曰  
河東瓶婁曰光陽白雲西南而遠曰興陽八顛在西  
而近曰雲峯荒山遠曰光州無等曰扶安邊山曰羅  
州錦城曰高山威鳳曰全州母岳曰靈岩月出西北



而遠曰長水聖壽或若培塿或若釘鉅而惟東之八  
公西之無等在諸山稍為穹窿也鷄立嶺以北縹氣  
漫空對馬島以南蜃氣接天眼界已窮不復了了亭  
午穿石門而下登中山亦土峯也郡人由嚴川而上  
者以北第二峯為中自馬川而上者甌峯為第一此  
為第二故亦稱中焉歷甌峯抵沮洳原原在山之脊  
而夷曠可五六里林藪番茂水泉縈迴可耕而食暮  
登唱佛臺其下無底其上無草木俯望豈原串麗水  
串蟾津之委岳陽縣之北曰青鶴寺洞其東曰雙溪  
寺洞孤雲嘗遊于此宿靈神寺北有石迦葉至



世祖時每遣中使行香其項有錢亦為倭所斫迦葉  
殿之北峯有二岩突立所謂坐高臺也法堂有蒙山  
畫幀其上有贊云頭陀第一是為抖擻外已遠塵內  
已離垢得道居先八滅於後雪衣鷄山千秋不朽傷  
印清之小篆乃匪懈堂之三絕也由直旨而下面東  
仰視天王峯若咫尺矣既下峻趾曳杖而行谷口有  
野廟遂更衣乘馬抵寶宅里踰登龜岵徑還郡齋

### 雲山筆錄

一士人於安東府山中石龕得一書名雲山筆錄柳  
西崖所撰多載鄭松江事士人持此書納于陶菴云



# 畚

畚字我國俗字萬不得已用於公家俗間文書而我國人不講六書雖善書者如踏字不作足旁沓而作踏令人心內不安偶看丹鉛錄刊本有一踏字作足旁畚雖是坊間傭書人誤寫者而於中原書初見故記之

## 日本之俗

有人言申青泉維翰嘗遊日本至曰日本之俗賤鄙  
~~難~~毒虐無比不近人情蓋此風自南而來故嶺南  
之俗較日本稍歇然為國中之最全羅道忠清道又



其次也京畿較又稍緩黃海道又其次而平安道咸鏡道若存若無一渡鴨水則坦然無所拘云此言理或然也然嘗見遼史遼俗防禁甚嚴而古者安定之俗即今錢塘之俗亦如我國也

### 三計

咸陽有一士某醇謹人也嘗言一日之計莫如朝不飲酒也一年之計莫如多淹醬一身之計莫如得賢妻

### 烟肉酒

偶與諸客各言所欲有一客曰僕所嗜烟肉酒三物余問三者如俱不得當去何物客曰先去酒其次肉



余問其次客瞠然曰如去烟雖生何樂

### 明氏事蹟

癸卯七月將赴京師宿于全州南門外明德祚家余問爾家有家族譜否德祚遂出示二冊夏王十三代孫銀溪察訪明廷者所謂申奎撰跋余剪燭揮汗一覽而訖使雷先癸初名光雷鈔之以備掌故○紀事本末蜀地悉平蜀主至京師封歸義侯居第京師而已授于高麗○昭代典則徙歸德侯陳理歸義侯明昇于高麗理昇居常鬱鬱不樂頗出怨言上聞之曰童孺輩言語小過不足問但恐為小人蠱惑不能保其始終宜



處之遠方可保全於是徙之高麗遣元樞密使延安  
答理護送而往仍賜高麗王紉羅文綺俾善待之○  
攷事撮要洪武五年壬子恭愍王二十一年中書省  
咨送陳理夏主家口令不做軍不做民間住過活○  
松都誌興國寺今為訓諫廳舊塔猶存廳後山下卽  
夏主所居 太祖平漢蜀將陳理夏主男婦二十七  
人出送我國使不做軍不做民間住過活夏主年十  
八理年二十二夏主為摠卽尹熙宗壻恭愍王賜米  
二十石布一千匹先主衾冕畫像猶存至壬辰之亂  
焚盡恭愍王賜夏主舍興國寺陳理舍松林寺特給



田土奴婢以兩縣貢物饋餉我 太祖朝有旨賜夏  
主華蜀君陳理平漢君職祿 太宗朝有旨賜忠勲  
世祿 宣廟朝有旨勿侵明氏陳氏後裔○效顰集  
夏主稱帝九歲見擒到我國母彭氏每夜祝天曰天  
乎天乎使我播遷專是蜀大臣之罪大臣與 大明  
相通使我兵專務拒東而引兵從西南八故遂至亡  
耳 太宗朝王妃冠服自 太明而來宮中不知被  
荷之術彭氏指教乃得知之明氏苗裔至今有居開  
城者余嘗見夏主畫像容貌端正爪不剪而長○涪  
溪記聞夏主之後陳䟽願赴試 朝廷許之明克謙



中進士其子先啓以文科顯明氏至今不絕 皇明  
通紀以為陳理夏主由海道向高麗飄飄然入于海  
矣蓋為疑辭即汎汎其逝之意也中原不知兩人善  
終於東方而有是言○十五世孫明行健作族譜序  
畧曰以夏主為始蜀地為貫今為一十六七九八世  
矣夏主諱王珍隨州人邑于成都國號大夏改元天  
統其胤諱昇年十歲嗣位改元開熙 皇明太祖正  
宇咨送我國建我 太祖朝待以賓禮 太宗朝賜  
世祿命建祠宇于延安 列聖朝連有 皇朝人調  
用之 教馮翊魚氏雲南南氏隴西李氏廣平田氏



次第顯榮而獨我明氏泯沒無顯云

嚴川古蹟

癸卯六月余遊頭流山憇嚴川寺問古蹟寺僧獻一冊載 仁穆大妃為亡弟追福願文曰嘗聞法身圓對照人若臺鏡忘疲慧力周通接物若衢樽待酌是以窺鏡者貌分妍醜祀樽者器識淺深善權之誘化無頗庶品之薰修有託幽則可銷冤釋憾顯則可拯苦拔危况能申孝悌之誠必易感慈悲之蔭我如虔懇佛豈食言弟子姊妹少遭閔凶深抱冤酷摧心於何怙何恃泣血於靡瞻靡依矧銜終鮮之悲倍結孔



懷之憾不天之責無地可逃豈期劉景辨周代之宗  
李弘別魏朝之禮採女功於台室奉嬪則於王家  
今則杞國憂深楚口口罷塊然獨處恍若有亡無因  
辭口以陳誠空效脫簪而落米顧私門之薄祐實行  
路之同嗟但以餘生有涯永恨無極若非注心義海  
何以澄宿對之因緣若非藉力法林何以助冥口之  
功德遂為亡弟追福於嚴川寺光學莊敬捨稻穀一  
千石且學以聚之問以辨之先聖所言後生所務敢  
將瑣瑣之財施特奉莘莘之法流雖慚撮壤培山終  
願導涓歸海每當廣厦集黌中之侶淨筵譚象外之



宗敬願山弟擺落塵羈超昇海會德分四衆為長者  
室之嘉賓法究一乘作如來家之勝友亦使十方庸  
品萬劫昏流俱乘般若之舟齊到菩提之岸

濫溪廟庭碑

濫溪書院卽鄭文獻公一蠹先生俎豆之所也其奉  
祀孫德濟建廟庭碑本菴撰鄉中諸大姓士族評議  
峻發以碑文列叙理學道統而不錄晦齋先生為本  
菴之過仍論德濟愆忠之罪德濟不得已稟本菴改  
撰本菴遂刪諸賢之歷叙者只稱六七作仍上石士  
論猶以為六七作之中亦含不錄晦齋之意轉益層



激廬氏宣國斧斲其碑鑿去本菴姓名鄭氏訴于監  
司因係宣國于咸陽獄今經二三監司俱未浚折聞  
鄭氏言則以為鄉中士族之祖先多有創建之功而  
碑中祇稱姜介菴它不槩見故起爭端聞士族之言  
則以為鄭氏不謀士林半夜豎碑公議不平云其碑  
曰我東自箕子以夷為華既二千餘年而儒學猶蔑  
蔑高麗有一鄭圃隱而論者或以忠節掩之當時蓋  
未知尊也其卓然為斯道倡接墜緒於中土者實自  
寒暄金先生一蠹鄭先生始沿是而有靜菴退溪栗  
谷牛溪沙溪尤菴同春諸先生代作至于今磊落燁



赫而天下道統之傳歸于我矣猗歟盛哉然而金鄭  
二先生皆遘禍言論風旨不甚顯此學者所以想慕  
痛慨於千載之下者也鄭先生世居咸陽子孫尚傳  
守焉嘉靖年間有介菴姜先生翼倡議立濫溪書院  
以祠先生丙寅 賜額蓋 國朝之有書院初于周  
武陵之竹溪而濫溪次之嗚呼先生者學者之祖也  
濫溪者書院之宗也豈復有尚於此者乎書院之作  
踰二百年而庭無碑諸生方謀伐石刻辭以豎之徽  
文於鍾厚鍾厚不敢以匪人辭謹按先生事行大致  
畧著於實紀而其英資異行見聞皆服斯固大賢之



奉下落  
未字

一節至若究貫經子辨析性氣則秋江南公撰述備  
矣後生小子何敢更為模象也哉其旌纘則敦自靜  
菴先生以及鄭文翼公先弼李文忠公元翼連陳于  
朝遂於萬曆庚戌從祀孔子廟庭 肅宗乙卯以鄭  
桐溪先生配已巳又享以姜介菴皆多士疏請得

命也介菴先生少斥弛不羈變而之道醇如也誠孝  
出天學造精微立法以貴自得務勉強為主用薦  
除昭格署叅奉拜而卒時年四十餘而同時儕類咸  
推之為老成宿德焉桐溪先生諱蘊舉進士薦以行  
誼尋擢文科官止吏曹叅判正色直言以立朝廢主



時斥殺弟錮 母妃之議竄濟州十年後當 仁祖  
丙子在南溪園中屢抗章力爭和虜不得則抽佩刀  
刺腹不殊屏居岩谷以終遂以身負天下萬世綱常  
之重噫鄭先生之道尚矣若姜鄭二先生或以篤學  
或以峻節皆口享之斯可以永垂來後而不泯何待  
碑哉雖然從今以往八是院而覩是碑者為激感於  
諸先生之道德節義而知自勵八而孝順於家於鄉  
出而忠於國則碑亦有助矣諸君子盍相與勉之後  
學清風金鍾厚撰黃運祚書

君子寺



癸卯六月二十三日與子光雷遊頭流山宿于君子  
寺有揭版事蹟余節畧記之天嶺之南五十許里有  
智異山智異之東麓下大溪邊有君子寺陳大建十  
一年戊戌新羅真平王潛邸避位居此因生太子而  
還國遂捨家為寺以是名焉自爾厥后荐遭兵燹或  
興或廢暨于麗朝慶元四年戊午佛日國師來止此  
山上無住菴專精內觀未幾將歸昇平之禪社道由  
山下見此遺基將營寶坊恨未遂願越明年卽命嗣  
法沙門眞覺國師曰善繼吾志而往葺之於是國師  
使其領袖先新佛宇漸完僧寮國師告衆曰寺已成



就吾敢久留令其門弟信淡主席於斯退居于金臺  
菴又移於斷俗寺旣而世多翻覆寺亦興廢者久矣  
延祐四年丁巳慧通和尚來到此寺廣修重構爰自  
麗世之季及至我朝之初屢經島夷之陸梁寺亦  
焚燬洪武三十七年甲申天台領袖行呼大禪師丕  
拓新揆彌崇舊制像室經臺無不克備康熙十九年  
庚申善士淳一韻釋改舊樓而換新信寬道人善新  
瓦而棄舊猶未丹雘甲子春通政太鑑法師奎以黜  
堊康熙廿三禩方壺苾芻荆谷復還書案東史眞平  
王元無後嗣今日生太子因以名寺云者未知何謂



也自爾厥尸之尸似是后字而本書作尸意者后字  
雖與後字通用而恐為嫌於后王之后故缺口而作  
尸歟寺今頽廢祇有苾芻十餘

羅麗石刻

成士執大中嘗錄示星湖李氏漢僊說中所記古碑  
使我求嶺南古蹟有曰三韓以前無所考近世王孫  
朗善君所輯大東金石錄殆無遺漏慶州有太宗武  
烈王陵碑大角干金庾信墓碑三水縣有草方院碑  
卽新羅眞興王巡狩記意者悉直始屬於新羅則嶺  
東之地皆古所有而鐵嶺之外亦有巡狩所及也後



禪下洛  
師字

句麗拓地傳海則不復有此矣扶餘縣有平百濟塔  
銘唐蘓定方所立又有平濟碑唐劉仁願所立晉州  
智異山斷俗寺有神行禪師碑釋靈業書雙溪寺有  
眞鑑國師碑崔致遠撰并書襄陽雪山有弘覺禪師  
碑集右軍書陝川伽倻寺紅流洞有崔致遠詩刻保  
寧聖住山有明慧和尚碑崔致遠文光陽白鶴山王  
龍寺有道詵碑奉化太子山有朗空大師白月棲雲  
塔碑金生書聞慶曦陽山有智證禪師碑崔致遠文  
以上皆新羅古蹟原州建登山興法寺有眞空大師  
碑唐文皇書麗太祖文靈岩月出山有道詵創寺碑



稷山素沙坪有弘慶寺碑金山黃岳山直指寺有大  
藏堂記集右軍書義興華山麟角寺有善覺國師碑  
閔漬文集右軍書高城三日浦有埋香碑楊州天寶  
山檜巖寺有懶翁和尚碑指空大師碑皆李穡文又  
有本朝無學碑林川普光寺有圓明國師碑元揭  
傒斯書危素文士執云忠州開天內村開天寺碑晉  
天福年間所立矜川安養面念佛菴下有安養寺破  
碑麗初物也

慎權兩處士

居昌慎敦恒鄉吏也治儒業讀書修行革帶布衣偉



如也家藏慶尚道刊本書籍無一遺漏與咸陽權克  
中友善克中家世甚微經明行修右道人士稱慎處  
士和易祥善嘗退讓謙謙權處士操守嚴潔然誨  
人不倦余見敦恒未及見克中敦恒子千能踰弱冠  
文藝夙就嘗從余遊請証其詩文藁其詩有曰鵠與  
烏羣便見親鶴隨雞伴豈相嗔為君暫屈昂藏氣近  
我無傷潔白身

咏蝶詩

古人咏蝶詩皆幽艷可誦偶記若干句錢起詩胡蝶  
晴憐池岸葉黃鸝曉出柳園花梁簡文帝首夏詩竹



樹下落  
飛字

蜂字

樹俱葱翠花蝶兩飛翔董思恭咏風詩花蝶自飄舞  
蘭蕙生光輝杜甫詩風蝶勤依槩春鷗懶避船熊夢  
祥詩鐵珊瑚樹鬼蝶陸龜蒙詩雙蝶鬪飛高雍陶  
詩荒園數蝶懸蛛網空室孤螢入窠巢白居易秋花  
紫蒙蒙秋蝶黃茸茸李商隱詩秋蝶無端麗寒花只  
暫香素易詩顰黃稍蝶驚還起翠碧窺魚去復來盧  
綸詩壞欄留衆蝶孟郊詩逃蜂匿蝶踏花來蘇軾詩  
傳伶寒蜂抱孤花王建詩幽花含宿彩早蜂寒弄翅  
李賀詩腰褭佩珠斷灰蝶生陰松李商隱詩孤蝶小  
徘徊陸游詩漠漠寒花欺晚照翩翩孤蝶弄秋光鄭



谷詩烟籠宿蝶枝林寬苦雨詩葉底遲歸蝶林間滯  
出鷺皮日休詩異蝶時似錦幽禽忽如鈿文同詩雨  
後雙禽來占竹秋深一蝶下尋花劉從益詩莊周枕  
上非真蝶樂廣盃中卽假蛇劉會孟詩無因化作千  
胡蝶西蜀東吳款款飛高啓詩萱留倦蝶連池綠樹  
帶殘鷺滿寺陰又知是隣家花落盡菜畦今日蝶來  
多

### 石湖集

余將再往花山郵借書于薑山薑山借范石湖集庭  
前雨柿樹翠葉初濃堂後紫筍過屋薔薇玫瑰黃紫



刺眼每日衙罷睡餘抄載若干首其請息齋六言十  
首洞門晝挂鐵鎖閣道秋生綠苔著下畧同龜伏瓜  
中且免蠅來多謝紛紛雲雨相忘渺渺江湖坐隅但  
忌占鵬屋上何煩譽烏灩澦年年似馬太行日日摧  
車笑中恐有義甫泣裏難防叔魚見影蜮猶鉞鉞聞  
聲厖尚狺狺問誰毛生名紙知我角出車輪不惜人  
扶難拜非關我醉欲眠勞君敬枯木耳恐汝見濕灰  
焉祝駕今吾將老結茅此地不喧恐妨蝴蝶同夢笑  
倩顛當守門口邊一任醺去鼻孔慵將涕收閒門冷  
落車轍空室團圞話頭冷煖舊雨今雨是非一波萬



雜言下常有  
來往對偶字

波壁下禪枯達磨室中病著維摩親戚自有情話來  
往都無雜言酒熟徑須相報文成聊與細論園丁以  
時白事山客終日相陪竹比平安報到花依次第折  
來○久病或勸勉強遊適吟四絕答之風月箇中老  
子江湖之上散人化鑪苦蘄清福環堵間拋好春鶴  
怨久迴俗駕鷗盟誰主載書一丘一聲謝汝三歲三  
秋望予捫蝨卽是忙事驅蠅豈非褊心香煖香寒功  
課分明白暗先陰羸如蓐婦多忌倦似田翁作勞玩  
具僧梳則屨歡棕丁尾龜毛○顯黃居窠雀竹圖二  
首羣雀歲寒保聚兩鶉日晏忘歸草間豈無餘粒刮



地風號雪飛蔓花露下凝碧叢竹秋來老蒼噪雀羣  
爭何事么禽自轉清篁○四時田園雜興步屨尋春  
有好懷雨餘蹄道水如杯隨人黃犬攬前去走到溪  
邊忽自迴種園得果塵償勞不奈兒童鳥雀搔已挿  
棘針樊笱徑更鋪漁網蓋櫻桃桑下春蔬綠蒲畦松  
心清嫩芥臺肥溪頭洗擇店頭賣日暮裹鹽沽酒歸  
右春日胡蝶雙雙入菜花日長無客到田家鷄飛過  
籬犬吠竇知有行商來買茶三旬蠶忌閉門中鄰曲  
都無步往蹤猶是晚晴風露下采桑時節暫相逢海  
雨江風浪作堆時新魚菜逐春回荻芽抽筍河魴上



棟子開花石首來。右晚春梅子金黃。杏子肥。麥花雪。  
白菜花稀。日長籬落無人過。惟有蜻蛉。蛺蝶飛百沸。  
縹湯雪湧波。縹車嘈囀雨鳴簌。桑姑盆手交相賀。錦  
繭無多。絲繭多千頃。笑渠放掉嬉花深。迷路晚忘歸。  
家人暗識船行處。時有驚忙。小鴨飛。右夏日。杞菊垂  
珠滴露紅。兩蛩相應語。莎叢蟲絲。冒盡黃葵葉。寂歷  
高花側。晚風靜看簷蛛結。網低無端妨礙。小蟲飛。蜻  
蛉倒挂。蠶兒窘。催喫山童為解圍。新筭場泥鏡面平。  
家家打稻趁霜晴。笑歌聲裏輕雷動。一夜連枷響到  
明。右秋日。斜日低山片。月高睡餘行藥。繞江郊霜風



紅落  
右冬日

掃盡千林葉間倚筇枝數鶴巢炙背檐前日似烘煖  
醺醺後困蒙蒙過門走馬何官職側帽籠鞭戰北風  
松節然膏當燭籠凝煙如墨暗房櫳晚來拭淨南窗  
紙便覺斜陽一倍紅○宴坐菴油燈已暗忽微明石  
鼎將乾尚有聲衲被蒙頭籠兩袖蓊牀無地着功名  
五更風竹鬧軒窗聽作江船浪隱牀枕上翻身尋斷  
夢故人待漏蒲韞霜○春晚陰陰垂柳閉朱門一曲  
闌干一斷魂手把青梅春已去滿城風雨怕黃昏客  
去鉤窗咏小詩遊絲撩亂柳花稀微風盡日吹芳草  
胡蝶雙雙貼地飛夕陽槐影上簾鉤一枕清風夢昔



遊夢見錢塘春盡處碧桃花謝水西流○江上天色  
無情淡江聲不斷流古人愁不盡留與後人愁○寒  
食客中有懷江郭花開也寂寥不須綠暗與紅凋疾  
風甚雨過寒食白日青春吟大招芳景尚隨流水去  
故人應作綵雲飄煙波千里家何在惟有溪聲似晚  
潮○次韻邊公辨錯落參旗胃竹梢柴荆臨水開蓬  
蒿清風吹曉玉蟾墮穠露洗空銀漢高雙鵲繞枝應  
也倦一蛩吟壁已能豪新秋只合添詩興莫學潘郎  
歎二毛○偶書掣目華中影現身有為皆妄懶方真  
已甘捐捐勤為圃休向滔滔苦問津書至五千空挂



腹錢非十萬不通神君看汗簡沈碑者隨水隨風幾  
窖塵○蠻觸蠻觸紛拏室未虛心知懲忿欠工夫腹  
須空洞方容物事過清涼已容吾萬仞我山高不極  
一團心火蔓難圖從今立示寒灰觀笑看蒼黃走鄭  
巫○顯藥簾合成四大本非真便有千般病染身地  
水火風都散後不知染病是何人石湖恰似白香山  
其晚年作尤是心印相傳其悟解處幾不可辨

林將軍影

癸卯李冬 上特命遞臣沙郵丞移拜廣興倉主簿  
與茅功懋冒大雪踰鳥嶺到丹月驛懶川時已昏黑



燃燭謁林將軍祠画像面甚脗眉濃黑磔如松毳間  
有三四秀毫勁健欲刺踈髯頗脩眼有三稜

### 新羅方言

爲官長能習方言可通俗情余初到沙郵吏隸之言  
驟聽不可解蓋新羅方言也余之言吏隸亦不能曉  
事多謬錯居無何余頗習方言遂以方言臨民嘗收  
糴納倉余試分付官隸曰居穰不完則羅洛必漏以  
請伊斂颺然後堅縛沙暢歸納于丁支間適有京客  
在坐掩口而笑曰此是何語余一一釋訓曰居穰者  
苦也羅洛者稻也請伊者箕也沙暢歸者藁索也丁



支間者庫也

達句長韻

達句長韻序沙斤李丞以內閣檢書帶本銜而出  
過余於閣學士巡相李公之營示其上閣學士鄭徹  
齋詩二十二韻余愛而留之丞去而曲江成使君以  
外閣校理出赴其任又過余余與沙丞曲江為文章  
交二十年忽遇之大嶺之南二子悲余之詩不作且  
久余既送丞歸喜曲江繼至留飲數日出丞詩相與  
歎賞遂刻燭而次其韻以迭試其退進余有客元生  
徹齋之戾邑也余因徹齋及公紀侍郎致之館巡相



公亦日邀與語生以其思徹齋和余詩袖諸作八謁  
巡相公巡相公曰何不令我與聞諸君以監司我也  
於是命生把筆一呼滔滔如也生疾寫不能及公又  
曰酒泉鄭太守有事當來其趣之無酒泉詩不可也  
東屏金子容進士亦來不不則問主人何日來也明  
日酒泉至又留曲江凡九宿於余新秋整暇霽天出  
月置名酒饌異香上下論古今人物詩文莫能違也  
酒酣又相與作草書一夜墨數斗盡巡相公數使妓  
覘之竢紙上畫墨暎則奪而收之以為歡酒泉既後  
至不肯獨自苦吟元生展紙進曲江止謹語余時喉



聲以挑之巡相公亦避座為肆其志酒泉輒以笑罷  
無索思色及歸過琴江北十里忽傳筒而至座中皆  
大驚時東屏亦已至連就二章諸詩多從而疊之夫  
酒泉巡相公之所難而曲江之所畏也東屏酒泉之  
所心許而必呼以癯仙者也余來嶺數年求嶺之雋  
而得癯仙癯仙於元生為口授師故置生右公紀嘗  
以書謂余有南金曲江舉酒賀之為文苑主人亦二  
士在爾軸成巡相公使曲江書二本一本送徹齋求  
和又以書求蕉齋沈按使詩蕉齋亦內閣學士而  
與余少為同舍即如徹齋之舊也八月元生之京師



余使生訪公紀侍郎道余因沙丞曲江近復作詩且  
以得諸學士詩欲求備於江湖之故人也云爾癸卯  
重陽洪元變太和題○原韻沙斤丞李德懋懋官作  
也徹齋閣學士鄭侍郎志儉號也曲江使君成大中  
士執也聞喜秀才元得鼎受之也東屏金得厚進士  
號癯仙子容字也子敬酒泉太守鄭文持淳也澄清  
主人按察使李公東模也得其詩不可以不知其人  
洪元變太和識○長句上徹齋鄭公學士且置閣務  
劇蠡午令公試聽下官語下官倘受令公知不辭甘  
心為僕園槎枒肝肺鬱奇氣詎堪低垂蓬蒿處行隨



使者蹕一騎飄然萬里燕中去彷徨躑躅玉鍊橋  
望烈皇舊紫籙綿州李生錢唐潘與我論文大酒  
所歸來依舊一牀書專於嬰兒靜於女照水影好憐  
山鷄緣木技拙慙石鼠韋布亦含水土恩有願區  
區效心膂通籍金門非夢思感激由來涕難禦唐朝  
供奉漢待詔聯武徐郎冷與楚學士紫瀾大瀛海檢  
書黑子小島嶼唯公降精東壁星主盟詞垣赤幟舉  
吾曹生并右文世伴直隨行今五暑汲深端合資  
脩綆懷大那能容小褚羣書名目解題陳小學扁旁  
說文許容我骨相不媚嫵畧我才具太齟齬天人性



命百家言語到精深公每與方其恍惚又璿璫太真  
靈犀燃牛渚兼銜驛丞自我始不循資格以齒序在  
前糠粃颺千里頭流之左濫濡溷地瘴令人骨戍削  
別後秋風將換紆懋官○梅竹軒留曲江使君飲用  
沙斤丞上徹齋學士長篇韻共賦郵客郵筒走旁午  
南紀初聞日邊語奎壁雲霄守東垣驛驕首宿散外  
園沙丞骭髀舊懋官飯蔬飲水猶甘處十年不見羽  
毛竒但聞飛八籠中去籠中日月捻雨露石渠書香  
通紫籙圖書集成五千卷有命披進君王所休  
文侍郎志黼黻康成學士心處女兩賢曾與我同僚



當時虎變麟臙鼠閣庭殊錫被  
恩早小臣銘鏤唯  
心膂臣罪不職二載冬未令州民凍飢禦我鬢徑變  
閱簿書我肌先痛對搖楚近日麥熟乍展眉携與二  
士遊蓬嶼龍吟鯨作沒雲浪一滌煩惱思遐舉南來  
壯矚盡海山北方故人值炎暑簾閣風清綠簟涼小  
妓傳詩披錦褚君是青城之巨匠記余妙齡同心許  
文章互出逾奇變老大相逢肯齟齬宦跡渾似雲龍  
逐檢書清新君所與渠曾走馬燕薊野君亦乘槎析  
木渚南北雙馳夜珠光歸來合置鳴球序嗟余椽筆  
獨無用染朱堆墨槩江淑卒然不釋尋舊興汗顏流



漬輕衫紆太和○一官驅遣路直午老大愁聽嶺南  
語弊衫硬帶束病軀行李低頓仗徒圍煌煌鳥喙導  
我行忽到巡家按節處芸香猶宿紫薇陰校書纔來  
檢書去直北星辰照衣裾魂夢相隨入紫籞半刺  
娛客風流足水簾華堂酒詩所金爐爇盡龍涎香蠟  
炬三夏列姣女官軒寂寂布琴棋訟庭清清退雀鼠  
鴻燕相失儘堪恨猶有同人托心膂廿載風塵兩華  
鬢醉來狂興孰能禦少留要觀南國風為是文苑揀  
翹楚頗哀老子婆娑意巾舄依依八孤嶼蓬萊咫尺  
記前路遲暮霓旌也再舉達城烟雨兩住人多梅鶴風



清逐殘暑棠帷送箋亦盛事醉墨淋漓倣虞褚蟲蠹  
性癖苦難除到處讐校却自許海山禽魚疇伴侶朱  
墨鹽米太齟齬試看虛舟橫野渡行止由天我何與  
別後山河更渺然箕斗相望一水渚長安槐柳隔暮  
雲故園松菊屬秋序脩鯨噴浪蜃沫青我獨胡為瘴  
海溼團扇題詩表相憶惆悵西風襲輕紵士執○我  
生之初歲庚午之無字識自學語逸氣早被名公賞  
目我天駒出太圉廿載漂泊嶺湖間忍令巨魚涸輒  
處世人見我毛骨殊勸我負笈長安去十叩朱門九  
不開姓名何由達宸籙躑躑軟塵珂馬塗悵望



奎閣星辰所日暮天寒返茅屋翠袖啼飢憐季女劇  
知樗櫟甘散材敢言鵷雛笑腐鼠無土可農錢可買  
事育何以殫心膂猶有一段礪磊氣為缸為甕苦莫  
禦復思放蕩壯心目寧愁棗馬太悽楚朝過商山問  
芝田暮宿金陵訪蓮嶼山東為客蘇季子海內何人  
孔文舉達句主人開逢迎置我涼堂遣炎暑太守風  
流滁亭歐刺史文章同州褚片言非敢云同志詞場  
往往濫推許馳峯素鱗佐置醴笙瑟詩書不齟齬憐  
爾青莊與青城英姿已被君王與承恩出入芸  
香閣仙珮琮琤雲漢渚偶然相逢梅竹館梧桐雨冷



驚秋序華駟昨送花山驛皂蓋將赴曲江漱我獨胡  
為此淹留遊子輕袷將換紆受之○元生袖示通判  
與曲江使君次沙斤丞長句仍說酒席風流之盛近  
時無此事久矣喜步其韻要書軸中一兩妨農枕支  
午元生解作驅魔語梅竹主人非俗吏曲江使君超  
凡圉忽漫嶠南兩相遭竟夕雲嵐接興處浦柳漠漠  
稻畦平前日沙丞從此去不嫌潦到綰墨綬均知雨  
露荷紫籞快讀沙丞放歌行脩竹琅然集酒所句  
當晚衙鴈驚庭安排夜讌如花女一斗始吐奇氣來  
孰為龜龍孰蟲鼠達士位不係卑尊人臣義在殫心



膾鷄割牛刀聖戲耳言氏之子知牧禦老夫無術荅  
諸公萬戶徒然擁金楚宋俗強梁古鷄林隱憂彈丸  
一馬嶼繡錯碁鋪七十州武力文事何曾舉未聞國  
風陳太史頗慙酷吏去大暑強欲臨池撥幽愁愛君  
腕力奪虞褚石渠古閣通摘文得之尺牘心已許不  
見三年叫絕竒老愈蒼健若齟齬筆以文悟文以人  
吾知梅竹性相與委曲癭藤走紋壁穩籍桃花漲錦  
渚精明結為夔球戛判置殷庠與周序聞喜秀才一  
相笑急灘和雨來金湫達城女兒理新曲來日華堂  
簇綺紆澄清主人○過達城見沙斤李丞贈吾宗鄭



學士之什達城洪使君曲江成使君前已屬和按察  
李公繼又賜和李公聞鄭學士已有荅李丞詩將欲  
索求而沈學士今按海臬李公且欲以書要和命余  
次其韻同書一軸洪成二使君亦固請不已輒忘蕪  
拙敢題其末達城官齋日亭午簷角風鈴時自語我  
來初賞二妙作迥如天驥空凡圉誰其倡者懋官丞  
以華易謾非君處檢書吾不識其面但見筆端查滓  
去奎閣昭回上麗天道山玉府連宸籓閣臣皆稱  
行秘書檢書儼直元同所吾宗學士文采盛洗濯雲  
錦須河女沈李侍郎椽作筆犂牛不肯甘搏鼠侍郎



論文昔同僚李公屬官投心膂聞欲索詩先見和已  
覺筆鋒摧強禦我如陋邦介大國王帛何由奉齊楚  
唯喜二子同周旋悅接仙袂遊蓬嶼成子論文三十  
載軒睂意氣猶翮舉洪子新知更云樂貌如清水座  
忘暑璨然驪額三百顆向我欣然解錦襜讀書萬卷  
尚下人意在鍼砭羞口許歷塊遇都曾不蹶字叶韻  
妥無齟齬乃知瓌寶能動人人所貴重天不與少迷  
不歸尚可惜老大胡為來瘴渚我為一飽詩屢啞強  
欲躡和言無序酒闌把臂肝膽露清秋月上琴湖漱  
明朝分袂此湖曲自古交情重縞紵子敬○余將赴



達城道遇酒泉使君曰子其亟往通判待子甚通判  
與曲江成使君各賦二十二韻長句按使公亦和之  
仍索吾詩吾諾而未及為也子其亟往吾詩成當付  
水遞及至通判示其詩曰此皆刻燭而就者也余讀  
至四五遍節節中尺度無倉卒意通判曰曲江聞子  
久待子不至頗恨而歸按使公督書日至子不可以  
無詩余方瑟縮退步竊幸載名大家之次遂步其韻  
以酬諸公待之之意出門初不辨子午行年六十猶  
生語壯不如人老更狂歲暮蟄鱗長圍圍近聞天上  
起新閣奎華壁芒仙人處學士踰踰檢書隨雲飛川



使下落  
君字

泳同來去布衣無路謁 明主田間背曝思 宸籟  
前宵來作達城客貴人詩篇匪尊所通判才思迫不  
群皎如洞庭遊天女一扣洪鐘自中律掃破啞蛩與  
唧鼠曲江使舊聞名八索九丘通心膂白雲東望海  
天濶萬里乘風懷列禦元戎況是 內閣臣王佩雲  
裳光楚楚當時草誥 君王前風雲動色瀛洲嶼卽  
看南斗避文星喜逢敵手鬪豪舉驪龍不眠競吐珠  
色奪朱鳥驅殘暑我時伏枕大江東羽翮摧殘擁短  
褚有時搔卷睨八極逸氣往往凌燕許欲赴良讌嗟  
不及匪我愆期迹齟齬人生一笑苦難諧路逢酒泉



立容與酷見東陽一夜瘦自慚河泊多秋渚西京學  
士已着鞭肯向元和盛山序我欲追攀意轉澁百回  
步蟾倚荷漱游魚瀟瀟水浩浩莫以重來拋輕紵子  
容

睡

睡有至理如渴睡漢之睡乃懶睡耳陳希夷之流得  
睡三昧余嘗曰夜間穩睡十分則神暢氣旺翌日萬  
事順成若失睡則茶然真成勞瘵人蓋余稟氣虛薄  
故每飯後昏昏坐睡霎時清新道家所謂辰巳之睡  
為龍虎交也將書希夷室三字于燕居之所兩壁書



康節放翁二絕曰半記不記夢覺後似愁無愁情倦  
時擁衾側卧未欲起簾外落花撩亂飛相對蒲團睡  
味長主人與客兩相忘須臾客去主人覺一半西面  
無夕陽

新羅始置驛

新羅炤智王九年丁卯三月始置郵驛脩官道即齊  
永明五年

蟹朝魁

蟹志云稻之登也率執一穗以朝其魁蘭譜云蜂採  
蘭花不敢挾于髀必負于背獻于其王嗚呼君臣之



義無所逃於天壤微物猶然彼為人臣子懷梟腸而  
抱撓肚者是可曰人乎哉

接人之方

袁采世範曰人之性行雖有所短必有所長與人交  
游若常見其短而不見其長則時日不可同處常若  
念其長而不顧其短雖終身與之交游可也長者言  
曰一味見人不是則兄弟朋友妻子以及于童僕鷄  
犬到此可憎終日落嗔火坑墜中如何得出故云每  
事自反真一貼清涼散也

此處

忍



杜少陵詩曰忍過此堪喜諺曰忍字敵災星內典曰  
忍含百善嘿定千差出問奇類林

毛詩講義

癸卯仲夏余應沈御史基泰檄翻草溪高靈等庫  
迺到觀察營巡使李公緇閱內閣毛詩講義挽余  
別館使之校勘居止何以郵務繁餽告歸李公又齎  
送講義于寒竹堂凡六日始訖蓋李公即原任直閣  
余方帶檢書宦游嶠南一為監司一為郵丞真勝事  
也仍有詩云閣臣方伯檢書丞盛事天涯見未曾王  
局何人脩勝覽應將古蹟嶠南增蘭蛇謂我異人眸



消盡先陰萬帙搜慧業如今猶未了隨身書局又南  
州一卷繙來吸一壺珍肴繹絡自營厨我公不獨於  
余好爲愛奎章閣上烏荷風竹露晚泠泠深樹嬌  
鶯抱膝聽病起晴嵐嫌白苧頭涼山色照書青櫻桃  
顆顆妒榴花節屆天中歎物華讀罷毛詩回首憶今  
朝御扇賜臣家可憐彤管與青衿小序如何不刺  
淫敢壞朱門公案了毛姓李紱開儒林

義信公主

錦林君愷胤女封義信公主為攝政王妻居亡何王  
殂清世祖以為公主既寡留之不可遂還本國公主



追懷攝政使巫招神翼其憑附一聞繾綣之言神終  
不降公主遂開奩篋探出攝政所戴貂皮帽子投諸  
巫前巫始搖鈴揚扇瞠目翻睂且哭且語說盡平生  
余嘗逢錦林外裔趙某聞此語

蛟龍城北山如戟

余往返南中每於馬上睡餘吟弄一二聯未暇足成  
多不記憶偶思三聯皆紀實也過南原登廣寒樓蛟  
龍城北山如戟烏鵲橋南水似羅又於咸陽學士樓  
得二聯雙溪雨歇銀魚上八嶺雲晴墨鶴飛一壺祠  
荒花的歷孤鴻村迥雨冥濛



商山饌

余莅沙郵不惟郵供不豐自奉甚薄客見余當食問  
曰何其淡泊余戲曰此商山饌也客曰只見蘿菹不  
見靈芝何謂商山余曰酸菹醢菹熟菜及羹都是蘿  
菹此非四皓乎客大笑一日客又見余當食問曰今  
日是何饌余曰此名豐年饌客曰今年荒何謂豐年  
余曰此饌酸菹醢菹生菜都是蘿菹此三白也古語  
曰臘前三白豐年之象客遂胡盧曰較諸東坡晶飯  
却濃奧矣

青莊館全書卷之六十九

庚午春上半從弟兼  
秀禾重書中半美洞  
金生  
半金第民城盛汝書下



[illegible]



[illegible]



[illegible]



[illegible]



[illegible]















